

سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ٩ ديسمبر ١٩٦٨

من سعت ٢١٠٥ الى سعت ٢٣٤٥

الحاضرون

الرئيس جمال عبد الناصر، على صبرى، حسين
المحسن أبو النور، لبيب شقير، كمال رمزى
الشافعى، أنور السادات، محمود فوزى، عبد
استينو، ضياء الدين داوود.

المحتويات

الصفحة	الموضوع
١	١- القوى المضادة فى داخل النظام والمناخ الذى يساعدهم
٧	٢- مواجهة ارتفاع الأسعار
٨	٣- مشكلة الصرف فى أراضى الحياض فى الصعيد، وبطالة عمال السد العالى
١٠	٤- تغيير قانون اتحادات طلاب الجامعة، ومؤاخذة الطلبة الذين اشتركوا فى الإضرابات
١٣	٥- مراجعة موقف الجامعة والاتحاد الاشتراكي فى الإسكندرية والمنصورة
٢١	٦- الطلبة الذين ضد النظام وانتماءاتهم الطبقية
٢٨	٧- ضمان الوضع فى الجيش والسيطرة على الجبهة الداخلية
٣١	٨- سير محاكمات الطلبة، وتاريخ فتح الجامعات والمعاهد العليا
٤٤	٩- إجراءات تطوير الاتحاد الاشتراكي وبرنامج تدريب الشباب
٥٦	١٠- الدراسات القومية فى الجامعات
٥٨	١١- أسلوب عبد الناصر فى مواجهة الماركسيين والشيوعيين والإخوان المسلمين، ونشاط الاتحاد الاشتراكي
٦٣-٨١	١٢- انتخابات مجلس الأمة، ودور الاتحاد الاشتراكي فى الترشيح للمجلس

سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ٩ ديسمبر ١٩٦٨

من سعت ٢١٠٥ الى سعت ٢٣٤٥

(جلسة الصالون)

سعت ٢٠٠٠ الى سعت ٢١٠٥

عبد الناصر: سنة ٦٩ سنة صعبة، ولن نحارب فيها. مجلس الوزراء مش ماشى زى ما الواحد عايز؛

بنقول كلام، لجان، ثم المواضيع تموت فى اللجان! صدقى عامل معوق كبير.. تفكيره زى تفكير زكريا ويمكن على مهندس.

وزير التخطيط ناصح، واكليته التلاتة.. حجازى، حسن عباس، صدقى، هو

بيترعب من صدقى سليمان!

كلام أمين شاكى فى بيروت.. كان قاعد مع ابن سعيد فريحة وفى بيت واحد

سعودى: الرئيس سلم البلد للروس! الرئيس محاط بفلان وفلان ونازل شتيمة فى كل الدنيا! وهو بيشتغل مع السعوديين ومفيش فائدة.

إبراهيم سعد الدين داير يتكلم فى كل حطة، عبد الفتاح أبو الفضل داير يتكلم،

صلاح دسوقى برضه! كل واحد واخذ موقف ذاتى وشخصى!

فيه مجموعات كانت بتاخذ مهايا من المشير وعربيات أنا مش بادى! يا إما

بيترحموا يا إما.. مشكلة والله أعداد لا تتصوروها ١٠٠ جنيه ١٥٠ جنيه وعربيات حتى للوزراء اللي بيروح له يديه عربية مرسيديس! أنا مابديش.

ولاد صلاح سالم دايرين يشتموا فى كل حطة. علما بأنى عملت المعاش ٣٠٠

جنيه بعد ما كان ٢٠٠ جنيه!

ياندى ياكل واحد يدور يتكلم! عملية الحقيقة! قادة الفرق والألوية كان كل واحد

بيسافر باريس هو ومراته شهر! دلوقتى اللى بيقول بم باحطه فى السجن!

يعنى على مانح حظيته فى السجن، هو قليل الحياء قاعد فى الميس يتكلم قام

الضباط ضربوه، وهو واخذ النجمة العسكرية! شوف الفرق وإلا الدنيا ماتمشيش كان عندى

فى البيت من جمعيتين عمال يشتم فى الروس والخبراء! دلوقتى بيدريوهم بدل تمرينين ستة!

حاجات مكناش نعرفها، قاعد هو بيقول: الاستعمار.. بقينا مستعمرة! الواحد مايبأخذش

فى الفترة اللى فاتت لكن لازم. أنا واثق من الدنيا بصرف النظر عن اللى بيحصل،

سرى للغاية

الجيش بقى موجود ومش مشكل والجيش بقى مضمون، الاتحاد لسه عايز وقت. زى العمليات مابتنعكس على الطلبة بتنعكس على الجيش.

لكن إحنا بقينا أخصائيين فى تكفير الناس! إزاي؟!

الأرباح والعلوات، فى رأى النهارده الناس وصلوا لنقطة مانقدر نعمل فيها إجراء زيادة. صدقى بيقول لى: فيه عمالة زائدة ببقى المصانع لازم يزيد أسعارها! طيب رؤوس الأموال لازم نسويها كمان وإلا هاتطلع الشركات خسرانة! فيه موضوع بصرف النظر.. فيه موضوع فى البلد كلها، هى البلد إيه؟ موظفين، عمال، فلاحين.

والوزراء بالكاد الواحد ماهيته بتكفيه، ومحدث يقدر يعمل فى الظهر وبالليل! لما نيجى لباقي الموظفين ويدخل فيها رؤساء مجالس الإدارات؛ لأن الماهيات نزلت لغاية أى موظف.. يمثلوا الطبقة المتوسطة. كان زمان على ماهر ييجى ينزل تعريفه فى الكيوسين، كانت بـ ١٦ قرش دلوقتى بقت بـ ٦٠ قرش، زيادة السولار!

الآن فيه كمان قضية فى البلد غير الثورة المضادة؛ الأول قلنا بيان ٣٠ مارس ولمينا الناس، الدور ده بنجيب المؤتمر القومى.. بعد كده إيه؟!

الواحد بيتعرض وبيأخذ العملية!

الوضع هو الآتى.. القوى المضادة، فيه ناس مضادين مايشغلوش ومعروفين بالاسم ولا لهم قيمة.

فيه ناس مضادين مايشغلوش، يعنى يقعد بالليل فى سهرة يتكلم كلمة يقول نكتة، يعنى مثلا عيلة البدراوى يقعدوا بالليل وهم قاعدين بيشرىوا كاس وسكى يقولوا نكتة على الرئيس مثلا، وأنا أعرف ولا أعمل له حاجة الحقيقة ده ولا يهمنى لأنه هو لا يساوى شئ!

بييجى بقى قصاد ده واحد زى أحمد سعيد مثلا، اللي هو بيجرى عند أمين هويدى ويقعد بيبوس إيديه وسامى شرف بيبوس إيديه ويجرى لكل واحد ويروح لأنور السادات ومش فاهم إيه! ده المنظر.. الصورة الأخرى.

الصورة الأخرى عندى من واحد من اللي هو بيتصل بيهم بيجى يقول بيقولهم إيه وبيسوى إيه ويتاع وبيتصل بالطلبة وبيتصل بالعمال! كلام يعنى أنا عمرى ما قعدت معاه، بيقول أنا قعدت مع الرئيس كدا وقال لى وقلت له! ويعقد يتكلم على أنور السادات وبيتكلم على كل واحد.. ده واحد بقى مضاد. فيه من هذا المثل أمثله بقى، هم الـ active دول هم اللي بيبقى لهم تأثير خصوصا إذا كانوا فى وقت ما محسوبين على النظام دول. واحد زى أحمد سعيد محسوب على النظام، فدول معروفين الحقيقة وضربهم

سرى للغاية

ممکن فى ٥ دقائق. بس مش هو ده برضه الموضوع، هناك مناخ وجو بيدى هذا أنا فى رأى إن إذا كنت بتقول الفانلة بقت بـ ٦٠ قرش!

استينو: من ٤ سنين كانت بـ ٣٠ قرش.

عبد الناصر: ليه بقت بـ ٦٠ قرش؟ هو ده الموضوع! يعنى أنا لما رحى المعرض الدور اللى فات وقفت جبت الراجل بتاع الشورجى واتكلمت معاه على الفانلات، كان أيامها مصطفى خليل وزير الصناعة؛ عايزين نخفض الأسعار ونعمل شرايات والكلام ده، لأن اللى عنده مثلا خمس أولاد بيحب للواحد جوزين شرايات. فالحقيقة هو القطاع العام ساء، وبعدين صدقى سليمان يقول لى العملية الشعبية محددة.. العملية الشعبية اللى هى البقطة والدمور والكلام ده، مهواش الحقيقة ده طلب الناس.

وفيه نقطة ثانية الحقيقة بالنسبة لهذا الموضوع برضه بالنسبة للطبقة المتوسطة، يعنى التليفزيون، إذا كان ده جاب تليفزيون الثانى بيبقى عاوز إن يبقى عنده تليفزيون، كنا نبيعه بـ ٦٠ جنيه بالتقسيط، النهارده بـ ١٤٠ جنيه! الشقق علما بأن الشقق فاضية ومحدث بيبيع.

فوزى: إخوانا المتخصصين يعرفوا أكثر منى طبعا، إنما يبدو إن عدد من الشقق دى رفع سعرها علشان يجيب إيراد أكثر..

داود: ما دى مامشيتش.

فوزى: يبقى الإيراد اللى أخذناه.. يبقى ضايقتنا الناس.

عبد الناصر: بالضبط.

أبو النور: عطل الإنتاج ودورة الإنتاج.

سرى للغاية

فوزى: من الناحيتين بقى ياريس، من ناحية إن فيها إصلاح إدارى لكن فيه هنصطدم بصخرة الموارد؛ هنعمل إزاي التحسينات اللي بيقلوا عليها.

عبد الناصر: تحسينات إيه؟

فوزى: يعنى أى تحسين فى إراحة الناس، مثلا نخفض الأسعار.

عبد الناصر: آه.. يعنى بقول نضبط أكثر من إحنا نخفض، يعنى ليه الفانلة بقت بـ ٦٠ قرش؟ نشوف هل إحنا اللي قررنا إن الفانلة تبقى بـ ٦٠ قرش؟

فوزى: هم اللي سعروا.

أبو النور: الشركات.

داوود: الشراب أقل شراب بقى بـ ٥٠ قرش الواحد.

أبو النور: لأ.. هم عملوا رفع فى عملية الفانلات.

شقيير: اللي رفعت الشركات.

أبو النور: العملية مجابتش شئ.

فوزى: وبعدين إمتى هيدرس؟ وبعدين هل الحالة يعنى تسمح بذلك؟

شقيير: لأ.. دى عملية ثابتة كل سنة بنعالجها، والعلاج بتاع كل سنة بيسبب.. لذلك المرة دى الحقيقة إحنا بدنا نبتره.

فوزى: لأ أفصله! بدون الموضوع يعنى بقدر الإمكان الناس تاخذ تصبيرة ويحسوا إن فيه انفراج.

سرى للغاية

عبد الناصر: اللي بدى أقوله وأكدته إن يعنى إحنا ضخمنا فى عملية الراجل العميل اليهودى الاسرائيلى ثم أيضا ضخمنا الثورة المضادة، وأنا حتى كنت موجه الناس تتكلم فى الثورة المضادة والعمليات اللي بهذا الشكل. ولكن أنا رأيى إن احنا فينا عيب لازم نعرفه، وده أنا إمبارح فتحته فى مجلس الوزراء ولم أصل الى نتيجة، وتهيألى بكره لن أصل أيضا الى نتيجة! لأن هوديه لجنة صدقى سليمان وفلان وعلان؟! صدقى سليمان بيقلنى الدنيا كلها. (ضحك)

الحقيقة أنا برضه حبيت أتكلم النهارده هنا، ويرضه بقول: إن الأخ كمال مع الأخ لبيب ممكن بيشفوفوا لنا الموضوعات دى كلها. الواحد ما هو دارى بحاجة، يعنى أنا ما بعث أجيب جوابات الناس.. إمبارح بعث شوفت جوابات، الناس بتشتكى. واحد باعت بيقل لى: إحنا العمال طلعلنا مع الطلبة والعيشة مش فاهم إيه والعيشة صعبة وحالتنا بقت، وإيه العمل؟! وبعدين مواضيع العمال النهارده فيه محاولات كثيرة لإثارة العمال. دلوقتى الحقيقة عملية العلاوات، مش عارف هنبحنها بكره، ثم أيضا إن السنة اللي فاتت صرفت الأرباح، مكانش فيه نية صرف أرباح أنا كلمت عزيز قلت له: إصرف.

شقىير: هم باعتين قرارات باستعداد صرف الأرباح أو سلفة على الأرباح، وهو الحقيقة لازم نشوف حل لعملية السلفة اللي مخدوهاش.

هندى سلفة أرباح، ودى ممكن تعالج اللي مش قادر يديهم السلفة الثانية؛ لأن الحقيقة أنا باتصور لو عندنا فائض فى الإدخار، وأنا بعتمد إن فيه فائض فى المدخرات ممكن استخدامه.. نستخدمه استثمار.

عبد الناصر: ماهو إمبارح سيد جاب الله بيقول له: إن ٢٧ مليون دول فائض إدخار (ضحك)، وإن طالما إن الأسعار ما ارتفعتش يبقى فيه مدخرات؛ يعنى الحقيقة لو بنضبط العملية كلها. عملية التسعير، العملية متناسبة.. يعنى العملية فلنت كده مرة واحدة وتهيألى داخله حاتفضل، وبعدين هو الانكماش يقود الى انكماش أكثر، وتبص تلاقى العملية عاملين نقفل فى الشركات وتبقى فيه بطالة، وتبص تلاقى نفسنا مالحناش عارفين إيه الموضوع!

الشافعى: وبعدين فيه برضه حاجات ما بين الصناعة وما بين الاقتصاد، بالنسبة للمجالس السلعية واقتناع وزارة الصناعة بيها وعدم اقتناعها بالنسبة..

سرى للغاية

شقىر: فىه نقت اختلاف بىنهم فى النقطة دى بالذات، يعنى المجلس السلى الاقصاد عاوز بىقى بتاعه على أساس إن نقطة التجارة تبقى من اختصاصه والتانى يصنع فقط. وزارة الصناعة بتقول لازم برضه بىقى لى.. وأنا بعتمد إن تنحصر المسئولية فى وزارة الاقصاد مع تطوير كل الجهاز بتاع وزارة الاقصاد فى التجارة الخارجية.

عبد الناصر: التجارة ولآ التموين؟

شقىر: أنا باتكلم على التجارة الخارجية يافندم. سيدتك يافندم بنشوف بتيجى التجارة الخارجية مستوردة سلعة وبتديها للصناعة.

الشافعى: يعنى مثلا الثلجة اللى ب ٢٠٠ جنيه واخدين عليها ٧٥ جنيه، فارتفع السعر لدرجة إنها.. فالصناعة طبعا بالنسبة للنقطة دى مش طايقاها أبدا! (ضحك)

عبد الناصر: شركات التجارة الخارجية، أنا رأى إنها كلها بايضة وعايزين يكسبوا بدون مجهود! أنا ماوافقتش على إن الصناعة تتعامل عن طريق التجارة الخارجية، ليه؟ لأن عارف إن ده حايفرض ١٠٪، بتاع التجارة الخارجية قاعد وهيفرض على اللى طالع فلوس واللى جاى فلوس! وبعدين يمكن حتى لما بيبيع بره بيبيع أقل من لما يطلع بيبى سعر أقل. لما بنشوف حتى بالنسبة للصحف، التجارة الخارجية دخلوا فى الموضوع وابتدوا يفرضوا علما بأن فيه مجلس هو اللى يشتري الحبر والورق والعمليات اللى بهذا الشكل، التجارة بقى عايزة تشتري وتأخذ عمولة!

الشافعى: هنا بقى اللى عاوز شركته تريح وبيان إنه ناجح ويوزع أرباح، وكل الاعتبارات دى طبعا بتعمل ردود فعل على اللى بيشغل فعلا.

شقىر: هى المجالس السلعية دى يافندم أنا أنشأتها فى وزارة الاقصاد، وكانت الفكرة فيها تتعلق بإظهار الجوانب المختلفة لأى عملية؛ يعنى بتوع الصناعة بيحبوا وبيقدرنا يشتروا وبيبعوا وبتوع التجارة يقدرنا يبيعوا ويشتروا، فلما يتحطوا فى مجلس واحد بيقول لنا: أنا أقدر أجيب السلعة بكذا وأقدر أجيب السلعة دى بكذا، يقوم المجلس حايقدر يجيبها بأرخص الأسعار الممكنة.. فبالشكل ده بيكشف العملية كلها.

سرى للغاية

الشافعى: هو بس لازم الصناعة تبقى مقتنعة وتدخل فيها بقلب يعنى ويبقى فيه تنسيق.

شقىر: هو الإصلاح الاقتصادى والمالى يافندم، يعنى إحنا اللي عملناه حتى الآن هو وضع تقسيم يمكن من عملية الإصلاح، إنما الحقيقة الإصلاح لسه مابدأش؛ إحنا اللي كنا عملناه الـ classification بتاع الميزانية.

عبد الناصر: الميزانية، بس طبعا أنا جيت أثرت هذا الموضوع، قالوا لى: إحنا حولناه الى لجنة بيان ٣٠ مارس. وأنا بقول: بتوع الإصلاح هم الأربعة، إن الإصلاح الاقتصادى دا كذا وكذا وفين الكلام ده؟ قالوا إحنا بطلنا على أساس إن بيان ٣٠ مارس، قلت لهم: لأ.. ده موضوع وهذا موضوع آخر ويتمشوا فيه. وأيضا بالنسبة لأرض الحياض، أنا طالب العملية بالنسبة للأرض اللي اتصلت وتوزيع الأرض الجديدة.

[ثم انتقل السادة أعضاء اللجنة التنفيذية الى قاعة الجلسة]

سرى للغاية

(بداية الجلسة الرسمية)

عبد الناصر: فيه هواء هنا؟

صوت: لا يافندم.

عبد الناصر: أمال الأوضة اللي كنت قاعد فيها تلجت!

الأخ كمال والأخ لبيب بتبحثوا الموضوع ده كله بتاع التسعير بحيث إن فى فترة قريبة نقدر..

شقىر: بعد العيد نكون جاهزين إن شاء الله.

عبد الناصر: يعنى مش ضرورى نأخذ سلعة.. سلعة بنشوف نظرة عامة، بعدين بنشوفوا محضر مجلس الوزراء بتاع إمبراح وبتشوفوا الكلام اللي حصل؛ لأن الحقيقة هو فيه متهيألى مواضيع لازم أو حتى نوقفها لأن فيه عمليات ماشية بدون إحنا ما نشعر وأسعار بترتفع.

شقىر: هو فيه يافندم عملية عاجلة، وفى اعتقادى إنها تقدر تعمل حاجة وينكسب فيها جزء كبير من الناحية الإنتاجية ومن ناحية الرأى العام؛ هى نقطة الصرف لأراضى الحياض الموجودة فى الصعيد، لو سببناها خطورتها كبيرة جدا وابتدت محاصيل من اللى هى لنا فيها ميزة كويسة وكانت بتطلع من الصعيد وينصدرها بسبب الأرض، بيقلوا: ابتدت تطبل، هيبقى خطرنا على التجارة الخارجية كبير فى وقت إحنا عاوزين نتوسع فى النقد الأجنبى فيه.

عندنا شركات المقاولات موجودة وشركات استصلاح الأراضى موجودة، ويعتقد إمكانيات إيدار موجودة لحد ٧٠ مليون جنيه إضافى منهم راح ٣٠ نزلوا استهلاك، نقدر نتحرك فى حدود ٤٠ مليون جنيه وبتنقق مع التخطيط لو فيه إمكانية الـ ٤٠ مليون جنيه بتتحرك من الجهاز المصرفى بدون ما تعمل ضغط.

عبد الناصر: التسوية فى الحياض؟

سرى للغاية

شقيـر: التسوية فى الحياض، ونبـتدى عملية صرف فى الحياض برضه يافندم؛ وإلا الأرض هتـطبل مننا بسرعة!

أبو النور: عمال الصعيد عدد كبير جدا عايشين على العملية بتاعة شغل السد العالى، راح الشغل بتاع السد العالى والنهارده كلهم قاعدين مفيش شغل فعلا. النهارده عاملين أثر فعلا مش لاقيين ياكلوا! الواحد لما يروح هناك بيلاقى طلبات شغل لا أول لها ولا آخر، الناس عايزة تشتغل، دون شك إن هذه العملية بتفتح الموضوع وتحسن الأرض نفسها.

شقيـر: وليس لها انعكاس يافندم على النقد الأجنبى.

عبد الناصر: ما هو القيسونى كان بيقول بنعمل طرق. (ضحك)

شقيـر: والآلات موجودة والعمال موجودين، والعمال بتوع الشركات بياخدوا أجر وبياكلوا فمش حاتزود استيراد أكل ولا شئ، كل ما هنالك إننا مع هذا الإتفاق بناخد حاجة إنتاجية. ويقول: الجهاز المصرفى أيضا ما يضايقناش نستطيع نأخذ المبلغ منه. هو قد تكون هناك مشكلة تمنع من هذا إذا كان فيه أى اتفاق خفى مع الصندوق، هو ده اللى أنا خايف منه.. جايز يكون فيه أى اتفاق معرفش اتفاقيات خفية مع الصندوق تمنعنا من هذا.

عبد الناصر: حسن مش ممكن يعمل من غير مايقولى أبدا.. حسن عارفنى كويس! (ضحك) مش ممكن يعمل اتفاق من غير ما يقول لى أبدا.

شقيـر: لأ.. لأ.. دا أنا بقول: يمكن البنك المركزى مش وزير الاقتصاد، ما هم بتوع البنك المركزى هم اللى بيفاوضوا.

عبد الناصر: بيروح نظمى.

شقيـر: آه بيروحوا ويقابلوا ويعملوا، فجايز فى العمليات الـ technical مش السياسية اللى بيقرها الوزير، إنما أنا أعتقد لو مشينا الخطوة دى يافندم ومن هذا الأسبوع، لا تأثير لها لا على أسعار ولا على أى شئ وهتفتحلنا عمل فى الصعيد وهتدى مجال.

سرى للغاية

عبد الناصر: ما هو سيد مرعى قال كلام بهذا الشكل بالنسبة لتسوية الأرض، وإن مستعد من بكرة يشتغل، وإن الشركات موجودة اللي هم عايزين يصفوها.

شقيير: أنا فى الجزائر بحثت الشركات وهى هناك بتقوم بمشروعات بتبنى.

عبد الناصر: بعدين هو الحقيقة هنا عملية البناء أيضا عملية مطلوبة؛ لأن النهارده لما بيتخرج كل سنة ٢٥ ألف أو ٣٠ ألف بتوع الجامعة بس غير العمال، عايزين يتجوزوا وعايزين بيوت؛ طبعا لازم نبنى بيوت، وبعدين نتوسع فى صناعة الأسمنت والكلام ده كله.

شقيير: وعندنا يافندم الأسمنت كويس، عثمان أحمد عثمان كان متقدم بمشروع إن لو إدينا له قرض دائم حوالى ١٠ مليون جنييه، بيبنى شقق للمتوسطين وبتكاليف مخفضة جدا، وثمان يعنى لما يقول هذا يقدر ينزل بالتكاليف فعلا، وبعدين بيقول: إدونى قرض أعمل بيه العملية دى وأبيع بالتقسيط للطبقة المتوسطة كشركة قطاع عام يعنى، ويعتقد إن هذا المشروع نقدر نمشى فيه وبيفتح مجال اللي سيادتلك قلته بالنسبة للي عاوزين يتجوزوا.

عبد الناصر: بالنسبة لموضوع الطلبة، أنا ماقريتش التقرير.

أبو النور: هو موضوع الطلبة، إحنا بحثنا الموضوع من ناحية تغيير القانون بتاع اتحاد الجامعة، وقلنا: إن أول فكرة فيه بنرجع النظام الأولانى مرة ثانية؛ وهو كل كلية الاتحاد بتاعها له رائد من الأساتذة ويحضر اجتماعاته ومايقاش بعيد، والرائد ييمضى على عمليات الصرف بتاعة الحسابات زى ما كانت زمان مرة ثانية.

وبعدين على أساس إن الاتحادات بتصل لغاية اتحاد الجامعة، ويبقى كله مرتبط من خلال لجان الاتحاد الاشتراكى.. يعنى تبقى لجنة الاتحاد الاشتراكى هى اللي مشرفة على حركة الاتحادات فى كل الكليات وفى الجامعة، على أن يكون الرائد بقدر الاستطاعة من لجان الاتحاد الاشتراكى.

وبالنسبة للاتحاد العام للطلبة قلنا: إحنا نختار الناس.. الأمين والأمين المساعد بتاع الكلية أو بتاع الجامعة، إذا كان هذا موجود فى الإمكان.

سرى للغااية

وبالنسبة للاتحاد العام للطلبة، يبقى الأمين والأمين المساعد بتاع كل جامعة ويكونوا الاتحاد العام بتاع الكلية، ويبقى مرتبط بلجنة شؤون التنظيم بالاتحاد الاشتراكي، وأمين لجنة التنظيم بتاع الاتحاد الاشتراكي هو المشرف على الاتحاد العام بتاع الطلبة، ويبقى فيه رائد له موجود أيضا من أساتذة الجامعة. وعلى هذا الأساس يبقى فيه ربط بينه موجود وبين الاتحاد الاشتراكي، والاتحاد الاشتراكي هو اللى يقدر يحرك العمل بتاع اتحادات الطلبة.

وفى هذه الحالة، لابد أن نعيد النظر أيضا فى موقف الاتحاد الاشتراكي بتاع كل كلية والجامعة على أساس تقييمه، وإذا كان فيه عناصر عايزه نعيد النظر فيها مرة أخرى طالما هو هيتولى الحركة بتاعة اتحادات الطلاب.

بالنسبة للنقطة أيضا بتاعة إن الناس تشوف شغلها أكثر، ففيه اقتراح إن احنا مانخليش إن حد يسقط فى أى سنة أكثر من سنتين، وإن مجموع السنين اللى يقضيها فى الجامعة ماتزيدش عن ضعف عدد السنين؛ يعنى إذا كانت الكلية ٤ سنين مايقعدش أكثر من ثمانية، خمس سنين الكلية مايقعدش أكثر من ١٠ سنين؛ لأن فيه ناس اللى بتسبب مشاكل الناس المخضرمين وقاعدين مالهومش شغلة.. يسقطوا أهم قاعدين! فدل بيعملوا مشاكل كبرى فى هذا الموضوع فبنخليهم يعنى يخلوا بالهم من عملهم شوية ومايبيقاش الطالب قاعد.

عبد الناصر: هو كان فيه قانون اللى بيسقط معرفش فى درجة إيه..

شقيير: هو موجود يافندم النص بالنسبة للى بيسقط فى السنة الأولى، لما يسقط فى أكثر من نصف المواد بيفصل من السنة الأولى أو السنة الإعدادى. لكن بعد كده حسب قانون الجامعة الحالى الطالب يقدر يقعد حوالى ١٣ سنة فى الجامعة بحسب السنين المختلفة! فالفكرة اللى أثرتها سيادتك إن احنا لازم حافز إنهم يبقوا جادين، فبحثنا الحافزين.. هل نعمل الحافز عن طريق فرض رسوم على الطالب اللى يسقط فى مادة ولاّ نعمل الحافز بطريقة أخرى؟

الحقيقة لما بحثناها فضلنا إن مانأخذش فى المرحلة الحالية بطريقة الفلوس..
أولا: علشان مانكفرش الآباء.. مانخليش الآباء يشعروا إنه فيه عبء نازل عليهم.

سرى للغاية

ومن ناحية ثانية: دى بتدى نوع من premium للطالب الغنى، يعنى لو ٢ فى نفس مستوى الذكاء والفقير سقط والغنى سقط الفقير مش هيقدر يدفع وهيطرد والغنى هيقدر يدفع؛ فكأن القانون حاخدم الفئة دى أكثر!

فقلنا: مرحليا الآن قد يحسن نأخذ الحل الثانى فى إن نخلى سنتين فى كل سنة حد أقصى وضعف عدد السنين بتاع الدراسة، وفيه رأى عام عند الناس لتقبل الفكرة دى بعد التعليم العام فنستفيد من الجو ده.

استينو: هو نظام الفترتين كان نظام كويس، وأمريكا دلوقتى حولت الى أربع فترات كل ٣ شهور امتحان، الطالب مايلحقش يبص فى حاجة أبدا غير المذاكرة.

عبد الناصر: هو كلية الزراعة لسه ماشية كده.

شقىر: هو نظامهم باستمرار كده.

استينو: فتحولنا الى نظام الفترة الواحدة، دى بتدى فرصة للطلبة إنها تلعب فى أول السنة وتيجى تذاكر. والعالم كله متجه حتى أنا بلغنى إن فى إنجلترا ابتدوا يفكروا دلوقتى على نظام الفترات مش فترة، معرفش بقى إحنا لغيناها ليه!؟

عبد الناصر: وأنا والله أعرف إحنا طبقناه ليه (ضحك) سنة ١٩٥٤. وبعدين الجامعة الأمريكية ماشية فترات وبعدين طلبة الجامعة الأمريكية مشغولين باستمرار فى البحوث؛ أنا منى كانت عندى باستمرار هى مهياش حتى بتاعة مذاكرة، لكن غصب عنها بقت تذاكر وتعمل بحث وبعدين إتقدمت جدا.

الشافعى: بس بقى عندهم حجم مايتجاوزوهوش، وبعدين بقى بيصرفوا فى مجال المعامل ومجال الكتب وكل حاجة متوفرة.

عبد الناصر: آه.

شقىر: هو النظام انتهى سنة ١٩٦٥ والحقيقة كان الغائه مش..

سرى للغاية

استينو: ولا فى صالح الطلبة ولا فى صالح التحصيل يعنى ولا حاجة، هل نقدر نعيده دلوقتى؟

شقىر: لأ.. دلوقتى مش الجو الملائم.

أبو النور: مابقاش جوها دلوقتى.

عبد الناصر: هو إنت أصلك إذا حبيت تعمل الحاجة بتحط الحاجة وما بتعرفش رد فعلها هيبقى إيه، فلانم نحسب ردود الفعل وأنا طلبت منك تحسب ردود أى عملية.

أبو النور: عملنا.

عبد الناصر: ولازم نجهز إذا حصل رد فعل كذا هنعمل إيه وهنصل الى أى مدى؟

أبو النور: هو تعديل قانون اتحادات الجامعة، عملناه بناء على التصرفات اللى حصلت منهم وبناء على اللى أثير فى المؤتمر؛ لأن دول لسه أولاد مايقدروش يكونوا نفسهم بنفسهم لابد من حد يشرف عليهم، وعلى إن الأساتذة مفروض إن هم دول اللى بيعلموهم وهم اللى بيوجهوهم؛ فهى العملية عملية توجيه لا أكثر ولا أقل فى هذا الموضوع. وأيضا على إن كل عمل فى الجامعة بيبقى من خلال لجان الاتحاد الاشتراكى، وربطها بالاتحاد الاشتراكى كقرار المؤتمر. ماشيين على هذا الوضع فى هذه العملية ومغيرناش، هم برضه الطلبة ماشيين وقلنا: بس بنأخذ فترة انتقال من هنا لغاية مارس، بنحل الاتحادات الموجودة حاليا وبنعمل اتحادات مؤقتة لغاية مارس.

عبد الناصر: الانتخابات الموجودة حاليا المفروض إنها بتخلص.

أبو النور: وقت مش وقت انتخابات أبدا، وقلنا: على هذا الأساس بنعمل اتحاد مؤقت لغاية مارس وبعدين نعمل انتخاب، ونكون أخذنا فترة تمهيد وفترة تكوين وفترة لم للناس نقدر نتحرك على أساس انتخاب بعد تعديل القانون.. ده من ناحية القانون.

سرى للغاية

من ناحية الطلبة أنفسهم واللى اشتركوا فى العمليات، إحنا بحثنا إسكندرية والنهارده كنا بنبحث بقية الجامعة. إسكندرية منها عدد كبير من هيئة التدريس والطلبة مشتركين، العملية خدت حوالى من ٤٥ طالب قرار بالفصل وحوالى ١٩ من هيئة التدريس واحد أستاذ والباقي معيدين كلهم.

ولكن كان لينا اقتراح من ناحية طريقة الفصل، قلت الآتى كبير جدا منهم مقبوض عليهم وبيتحقق معاهم، فقلنا: إن النيابة - على نور الدين - الناس اللى هو من التحقيق ضامن يدخلوا المحكمة ويأخذوا حكم دول يقدمهم للمحكمة الناس اللى فيه شك إن المحكمة تبرأهم مفيش داعى يقدمهم للمحكمة، ويقدمهم للجامعة بقرار من النيابة لمجازاتهم إدارى. وعلى هذا الأساس ممكن بالقانون بتاع الجامعة وفيه مادة بتعطى لعميد الكلية وتصديق مدير الجامعة فقط من غير مجلس تأديب ولا حاجة، إنهم يمسكوا هؤلاء الناس ويدهم الجزاءات المتفق عليها. والجزاءات بتمشى على أساس إن العناصر المشاغبة اللى معروفة إنها دائما عنصر فساد وعنصر مشاغبة بيأخذوا فصل، والباقيين مثلا بيأخذوا مثلا فصل سنة - سنتين جزاءات من هذا القبيل.

عبد الناصر: إسكندرية الحقيقة فيها نقطتين ضعف..

النقطة الأولى: الاتحاد الاشتراكى والأمين بلوة كبيرة قوى!

أبو النور: اللجنة لما سيادتك تمسكها مفيش حد خالص!

عبد الناصر: هو الحقيقة راجل طيب قوى قوى.

أبو النور: هو طيب ومخلص وكل حاجة.

عبد الناصر: مخلص آه.. وقريبى! (ضحك) لكن ما أولا مش عارف يقرأ ولا قادر يقرأ، طيب هيمشى بإسكندرية إزاي؟! وبعدين بأقرا فى الجرايد الجمعة اللى فاتت إن وزير الخارجية اليوغوسلافى هيسبب وزارة الخارجية ورايح يمسك عصابة الشيوعيين فى صربيا، ومش عارف مين الثانى هيتعين فى.. النهارده عندك إسكندرية الحقيقة عملية أساسية؛ ده موضوع الحقيقة المؤتمر وإسكندرية مافيش واحد كويس؟!!

سرى للغاية

أبو النور: بالنسبة للجنة مفيش!

عبد الناصر: لا.. لأ.. نجيب المؤتمر وبنقول لهم: بنحل اللجنة، وبنقول لهم: هاتوا لنا لجنة تانى. لازم الحقيقة ناخذ قرار فى هذا الموضوع وإلا إسكندرية بنقلت، وأحمد كامل برضه حايتهب.. أحمد كامل شاطر وكذا، لكن إذا مكانش فيه اتحاد اشتراكى! وبعدين بيطلع سكرتير مدير الأمن جاسوس لاسرائيل! سكرتير مدير الأمن فى إسكندرية اتقبض عليه فى قضية الحداد!

شقير: السكرتير الحالى ولآ السابق يافندم؟

عبد الناصر: الحالى.

شقير: هى إسكندرية يافندم - لو أذنت لى - أنا باقتراح لجنة معينة تشوف كل الوضع فى إسكندرية.

عبد الناصر: الموضوع الثانى: اللى هو برضه مدير الجامعة، يعنى أنا عارف بغدادى هو راجل طيب وكل حاجة لكن..

شقير: والله يافندم - لو أذنت لى - فى اعتقادى هو بغدادى من أقوى مديرى الجامعات، يمكن هو كوزير كان له أشياء أنا معرفش ما شفتوش كوزير..

عبد الناصر: هو كان وزير إصلاح.

شقير: وأنا لم أعرف الدكتور بغدادى إلا وأنا فى الجامعة، أنا بأشهد الله وأمام سيادتك: إن بغدادى من أقوى مديرى الجامعات معانا فى أكثر من ناحية؛ بغدادى كان ماسك عمل سياسى فى العام الماضى كويس لحد ما حصل تصادم ما بين الاتحاد الاشتراكى ببعض عناصره والمحافظ فى هذا الوقت.. أنا باحط الصورة بالكامل أمام سيادتك يعنى.

عبد الناصر: لأ.. وحمدى أنا عارف كان طريقته يكسر كل الدنيا!

سرى للغاية

شقىر: هى دى! بغدادى كان فى رمضان فى العام الماضى إسكندرية من أول المنتزة لحد آخر حته فيها، عمل سياسى بيقوده بتوع الجامعة وكان ماسكهم. شغل التناقض بين المحافظ وبين مدير الجامعة فى هذا الوقت، استقطبوا جزء من أساتذة الجامعة الللى موجودين استهيبوا على بغدادى! ودول بدأوا يتحركوا ضد بغدادى، مع الأسف العناصر التى استقطبت فى نظرى عناصر انتهازية وبانت أمام سيادتكم فى المؤتمر.

عبد الناصر: درويش؟

شقىر: المجموعة بتاعة أحمد درويش ونعيم أبو طالب.

عبد الناصر: أبو زيد أنا رأيت إنه راجل كويس فيه إخلاص، لكن درويش واضح أول يوم قال: إنه عيان فى المؤتمر، وبعدين تانى يوم لما اتكلم.. اتكلم كلام غير الكلام..

داوود: وبيقول فى إسكندرية كلام تانى!

شقىر: وهو جاي النهارده بينكلم يقول: ياريت ندى الناس تروح تشوف الطلبة المسجونين، والاشاعات شغالة على الطلبة، وإن الشاطر إنقتل والكلام ده كله! قلت له: طبعا الشاطر حايبان فى المحاكمة والناس هتشوفه.

عبد الناصر: هو يظهر حلقوا لهم شعرهم وعملوا تصرف بهذا الشكل، أنا سمعت إمبراح. الحقيقة نفس التصرف غلط! أنا عرفت من الأهرام جايين لهم صور وحالفين شعرهم، الأهرام قال علشان ماتخليش حد من الجرايد تتشر، عملية مالهاش.. عندك فكرة؟

شقىر: مالهاش داعى أبدا.

عبد الناصر: حلقولهم شعرهم ولبسولهم هدوم السجن! معرفش أنا هدوم السجن حقيقى ولا لا؟ لكن عملية الحلاقة أنا أتأكدت منها وكلمت شعراوى؛ لأن الموضوع حادخله المحكمة وحالق له شعره؟! زى ما عملنا فى الإخوان حلقوا لهم شعرهم! وبعدين درويش.. هو درويش سافل! أنا رأيت إنه انتهازى وسافل وبرضه ليه ضلع كبير جدا، هو كان بيقول: إنه كان جوه اللجنة فى كلية الهندسة. درويش جاب ناس من الطلبة وجاب عدد من الكلية

سرى للغاية

وقالهم حايساعدهم فى الامتحانات على أساس بيعتولى أنا برقيات؛ علشان العمادة..
يمدوله.. وإذا مكانش يعملوا..

شقىر: كان فيه تحرك طلابى علشان بييجى عميد.

عبد الناصر: فالطريقة دى الحقيقة مش سليمة، إذا كان واحد فى اللجنة المركزية بيعمل عملية بهذا الشكل! الحقيقة إحنا لسه عايزين فى المستقبل كيف نأخذ إجراءات بالنسبة لهذا.

شقىر: وفى فبراير يافندم بغدady - أنا بأدرس سلوك بغدady - كان أكثر مدير مستعد يأخذ حركة أيا ما كانت لمنع. النهارده فى الحركة اللى موجودة بغدady the most solid من المديرين بتوع الجامعات فى العملية. بييجى يقال: إن بغدady فى نقطة الشاطر تهاون! أنا باعرض نقطة عاطف بتاع الامتحان، بقول: عاطف الشاطر لما قبض عليه فى جريمة الغش فى الصيف وجه الوكيل راح رافده من رئاسة الاتحاد؛ فى اعتقادى الإجراء ده كان غلط لأنه لا يجوز قبل أن يحاكم تأديبيا على جريمة الغش إن أنا أشيله من رئاسة الاتحاد اللى هو جاي فيه بانتخاب الطلبة. لم تخفى العملية على الطلبة، فالطلبة تحركوا وقالوا: إن ده جاي بانتخابنا فلا يجوز أن يسقط إلا بانتخابنا. وأنا فى هذا أنا اللى قلت للدكتور بغدady: لأ.. قراركم فى إلغائه من رئاسة الاتحاد بقرار إدارى منكم لا يجوز، فشيلوه لكن قدموه للمحكمة التأديبية، عاطف الشاطر قدم للمحاكمة التأديبية وأخذ حكم محاكمة تأديبية..

عبد الناصر: خد إيه؟

شقىر: يعنى أخذ حكم محاكمة تأديبية عن جريمة الغش وهو حرمانه من الامتحان لمدة سنة، وبغدady أصدر هذا الحكم. شنع وقيل: إن بغدady بعد ما صدر الحكم على الغش شاله من عليه! لا يملك بغدady إنه يشيل حكم الغش لأن حكم الغش من مجلس تأديبى بغدady لا يملك إنه ينقض قراراته، ده بيصدره وكيل الجامعة وبيشكل من لجنة تأديب، بغدady ليس له سلطة فيها.

سرى للغاية

فهى حملة لتحطيم بغدادى استمرار لتحطيم القيادات اللى كانت ممكن تبقى متعارضة مع المحافظ. فى اعتقادى يافندم ومخلصا لا يوجد غير بغدادى يستطيع أن يمسخ جامعة إسكندرية الآن، ولا يوجد ما يجعلنا نستبعده لأن الرجل وقف معنا موقف كويس فى فبراير.. قاد العمل السياسى كويس.

عبد الناصر: لأ.. هو إذا كان مش ضعيف يبقى.. هو راجل على خلق.

شقىر: لا.. هو مش ضعيف، جايز كوزير أنا معرفش إنما كمدير جامعة، وبعدين هم يافندم عازوا يثيروا مسألته فى اللجنة المركزية علشان يضحموها وتأخذ..

عبد الناصر: طب وأبو زيد ليه حب..

شقىر: أبو زيد الواقع أنا فى اعتقادى خاضع تحت تأثير أحمد درويش، لكن أنا استقطبت أبو زيد.

عبد الناصر: لا.. أبو زيد أنصف من درويش.

شقىر: وليس انتهازى.

داوود: فى المعركة كان فى المجموعة اللى انسحبت علشان تضرب حسن.

شقىر: وبعدين بيقولوا: سقط فى انتخابات الاتحاد الاشتراكى! طيب شوف سيادتك أخذ أكبر نسبة فى المرحلة الأولى اللى هى الوحدة وأكبر نسبة فى المرحلة الثانية، وبعدين لما وصلت للمرحلة الثالثة أحمد درويش كتل ال ١٢ واحد عليه!

عبد الناصر: وبعدين هو المحافظ كان مع أحمد درويش، وبعدين هى كانت الخطة إن أحمد درويش هو اللى ييجى أمين الاتحاد الاشتراكى. وبعدين هو الموضوع أولا أمين الإسكندرية، وبعدين أمين المنصورة كمان ضعيف.. مين؟

سرى للغاية

أبو النور: محمد السيد.

عبد الناصر: أما وقف هنا قلت يادى المصيبة! أما وقف محمد السيد يتكلم، قلت الكلام اللى بيقوله هيكل على الاتحاد الاشتراكى خفيف بالنسبة للى حايقولوه علينا الناس أما يشوفوا محمد السيد! الحقيقة هو هيكل بيهاجم بره، أنا شايف منشور إمبارح ٤ صفحات هجوم على هيكل؛ إنه بيحاول يدى مبررات! هو أولا هجوم علىّ ثم هجوم على هيكل، بيتوزع فى باريس.

هو هيكل فى هذا الكلام بيقول: يجب على الاتحاد الاشتراكى كذا وكذا بيبين للناس إن فيه نقط باينة. أما يقف بقى محمد السيد بالشكل اللى وقفه فى التلفزيون والطريقة اللى هو واقف بها كده يقول: حسنة الله بأسيادى ومش فاهم إيه!

أصوات: (ضحك)

عبد الناصر: يعنى الناس بيقولوا عليه ده اتحاد اشتراكى؟! وأنا ناس اتكلموا معايا بقول لهم: طب ما ده جه بالانتخابات.. بتقولوا لى الانتخابات! بقى يعنى اللى إنت عايز تجيبه قطعاً تعرف تجيبه! (ضحك) يعنى ما حد بيصدق عملية الانتخابات! محمد السيد محسوب علينا إن احنا اللى جايبينه والحقيقة إحنا اللى جبناه العملية بهذا الشكل. وبعدين البلد منقسمه وضايعة هناك فى المنصورة، وإنت روحت شوفت فده موضوع برضه أيضا عايز حسم.

الحقيقة أما وقف بعد كده شاهين يتكلم، أنا قلت ألحق بقى أخلص من شاهين وإلا الناس بتلعن أبو الاتحاد الاشتراكى. يعنى البلد كلها بتلعن أبو الاتحاد الاشتراكى! والحقيقة ترددت لكن قلت له ينزل لإنقاذ ما يمكن إنقاذه.. قلت له: اللى معندوش جديد ينزل لأن هو أنا شايفه ماسك مجلد أد كده ويحصل هيقعد يقرأ فيه! هو وقف حتى بعد كده فريد عبد الكريم آهو كان كويس يعنى شد الناس، ومتهيألى برضه ما حسنتش قوى دور الاتحاد الاشتراكى.

موضوع أمين إسكندرية وموضوع أمين المنصورة عايزين بت، معرفش القانون فيه إيه؟ لكن أنا متهيألى اللى احنا عايزين نعمله.. نعمله، بصرف النظر عن القانون بأى وسيلة يعنى، ولكن الحقيقة لازم إسكندرية يبقى فيها أمين أساسا.

سرى للغاية

أبو النور: الحقيقة هو نفس التنظيم بتاعها مفيش شغل ٦ شهور ولا اجتماعات إطلاقاً.

شقيير: مانشوف غيرهم ولا النشرات.

عبد الناصر: هو حمدى كان ليه هدف، عايز يمسك الاتحاد والمحافظه مع بعض.. الاتنين، هو حمدى كويس وشغال وكل حاجة لكن هو رذل! دلوقتى الحقيقة أحمد كامل الرجل متفاهم وهو بيعرف بتوع إسكندرية بتوع التنظيم لأن كان فى الرئاسة كان بيروح هناك ويعنى قلبه جامد..

شقيير: وعلاقته ببغدادى كويسة قوى.. الاتنين كويسين جدا.

أبو النور: أحمد كامل دوغرى ومالوش حاجة يعنى.

عبد الناصر: آه.. فلانم الحقيقة بسرعة، وأنا فاهم إن شاهين عايز يمشى أنا سمعت هذا الكلام.. قال لحد إنه عايز يمشى. بنفكر نجيب حد مش من اللجنة يعنى نفكر من المؤتمر ولو نأخذ قرار بحل لجنة إسكندرية كلها وبنعمل انتخابات ثانية، والعملية دى ممكن تتعمل؟

السادات: تتعمل قوى.

عبد الناصر: زائد المنصورة.. تشوف موضوع المنصورة. إنما أيضا أنا متصور إن بتوع الاتحاد الاشتراكى اللي مانجحوش بيشتغلوا ضد! عندنا عمليات موجودة والواحد قريبا الجمعة اللي فاتت؛ يعنى مثلا بتوع منظمات الشباب القدام فى إسكندرية، فيه دلوقتى عاملين كتل بتشتغل ضد، وبعدين فيه فى الإسماعيليه أيضا مجموعة بتشتغل ضد، مابيقولوش ضد الرئيس لآ بيقولوا: لازم ندافع عن مصالح البلد وحاجات بهذا الشكل! الحقيقة المشكلة فى منظمة الشباب وفى المعهد إن احنا جبنا ناس وحشيناهم وعرفناهم ببعض، وده أهم موضوع إن الناس تتعرف ببعض، وبعدين إحنا ماربطناهمش.

أبو النور: وإديناهم طريقة الحركة.

سرى للغاية

عبد الناصر: وطريقة الحركة وسبناهم، فبقت كل الناس بتتكتل والعمليات اللي فى الجامعة النهارده أكثرهم من بتوع منظمة الشباب، دلوقتى طالعة عمليات جديدة فى المحافظات من بتوع منظمات الشباب! وبعدين المعهد أيضا أساء إساءة كبيرة برضه بقى يجيب ويعرفهم ببعض.

الحقيقة إما بتجيب ناس وتعرفهم ببعض إذا مكانتش العملية مربوطة خالص بيتقبلوا على طول، إذا ماديتهموش اللي عايزينه بيتقبلوا عليك!
وبعدين ثانيا: مابناخدش إجراءات معاهم، فكيف الحقيقة لما جم قالوا عايزين منظمة الشباب تقوم مرة ثانية، الواحد ماهوش عارف بنقوم إزاي؟ وإزاي العناصر المضادة النهارده واللى كانت عندنا فى منظمات الشباب إزاي نشغلها؟!

السادات: نفس الحالى دى موجودة فى المنصورة ياريس.

عبد الناصر: ومنتهىألى فى حنت أخرى يمكن إحنا مانعرفهاش، عملية حلوان..
أولا: اللي قام بعملية حلوان منظمة الشباب، أول واحد اللي هو قال أنا عايز رقبة بلطيه وأحمد فهيم ومش فاهم إيه، وطلعوا يعنى بالعملية! وبعدين الناس اللي وقفوا وقالوا "غير غير ياجمال" أيام ما كنت هناك..

السادات: فى حلوان.

عبد الناصر: هم قصدهم أغير أحمد فيهم وبلطيه! (ضحك)

أصوات: (ضحك)

عبد الناصر: فأنا رأيت الحقيقة إحنا عندنا موضوعين النهارده بنشتغل فيهم..
اللى هو الموضوع بتاع التنظيم ولمّه، وده الموضوع الأساسى.
والموضوع الثانى: هو موضوع إن احنا نبتدى نحل مشاكل الناس ونخفف الضغط عنهم، ويعتبر الاثنين مكملين لبعض.
فيرجع تانى الموضوع فتح الجامعة هو اللي جرجرنا للعملية.

سرى للغاية

أبو النور: بالنسبة للطلبة زى ما قلنا لسيداتك، على نور الدين العناصر اللي واثق منها إنها ممكن يصدر عليها أحكام بيقدمها لمحكمة أمن الدولة، وبأسرع وقت تبت فيها مش عايزين العملية يعنى تطول علشان مش عايزين نفتح الجامعات قبل ماتنتهى الأحكام.

عبد الناصر: كده؟

أبو النور: لازم دول لابد..

أولاً: بيان إنهم فعلاً حصل منهم جرم وأدينوا على أساسه.

ثانياً: الجزء الثانى اللي هو مشاكل إنه ياخذ أحكام فى محكمة أمن الدولة بيجوله للجامعة، على أساس إنه يحاكم تأديبياً، ويحكم على سبيل استعجال بواسطة مدير الجامعة بأسرع وقت ينتهى. وفى هذه الحالة يبقى بتينا للناس بالأحكام، وأصبحت العناصر المشاغبة قدرنا نطلعها بره بطريقة مفيهاش ناحية تعسف.. بطريق إثبات وتأديب عملية قانونية طبيعية تمام، وعلى هذا الأساس نقدر نفتح الجامعة ونتحرك من غير مشكل.

عبد الناصر: طب ده إسكندرية، والقاهرة؟

أبو النور: القاهرة شغالين فيها فى نفس الوضع.

عبد الناصر: بس هل فيه حد فى القاهرة؟

أبو النور: لأ.. فيه ناس اشاركوا فى عملية الكوبرى.

عبد الناصر: هم ٣٨ اللي مسكوهم.

أبو النور: وفيه جزء إحنا كنا بنتكلم فيه النهارده على طريقة محاسبته، كنا لسه بندرسها موصلناش الى طريقة شكلها إيه، يعنى كدراسة كنا قاعدين فيها لغاية الساعة ٣،٣٠.

عبد الناصر: لأ.. فيه ناس فى كلية الهندسة، وفيه ناس فى كلية العلوم، وفيه ناس فى كلية الاقتصاد، وفيه ناس فى كلية الحقوق.

سرى للغاية

أبو النور: والمعاهد العليا طلعتناهم كلهم النهارده، هى المشكلة بالنسبة للناس اللي هم لا فيه عليهم تحقيق ولا أى حاجة إلا معلومات. كانت دى النقطة الوحيدة كنا بتتناقش عليها النهارده؛ طب دول لو اتقدموا للجامعة كمجلس تأديب حتى مش هياخدوا.. محدش هيديهم حاجة!

عبد الناصر: لأ.

أبو النور: الطريقة إيه؟ الطريقة عند سيادتك مش عايزين نجيب طريقة من بره، مش عايزين يطلع قرار بفصل دول.. مايمكنش يعنى مش عايزين نوصل لهذه الناحية. دى النقط اللي قلنا لوزير التعليم العالى النهارده يبحث لنا باعتبار حانقعد يوم الأربعاء، يقول لنا إيه الطريقة اللي ممكن نبت فيها فى هذه العناصر بطريقة قانونية.

عبد الناصر: ده هو البرلسى هو اللي هيقولكم؟! (ضحك) إنتترفز فى خمس أيام مابقاش عارف راسه من رجليه! (ضحك)

استينو: متهيألى لبيب هو عارف اللايحة يعنى.

شقىر: إحنا يافندم بنشوف نفسينا نص اللايحة الحالى حا يكون مستحيل إن الأولاد دول يفصلوا، وفى اعتقادى يافندم العملية لها أبعاد عديدة..
أولا: بالنسبة للإسكندرية، كنا بنقول: إن لازم محكمة أمن الدولة تخلص من العملية قبل مايفتح، لها برضه أهداف كثيرة مش عايزين نفتح وفيه تساؤلات عند الأولاد يعنى يبقى واضح إن فيه موقف.

عبد الناصر: يروحوا يقولهم ده مات وده..

شقىر: وهيشاع هذا إنما لما بنفتح وفيه أحكام صدرت وبنعلنها، وبعدين لا نترك فرصة لأى حد يحاول يحرك الأولاد للضغط، لأنهم فاهمين إنهم يقدرنا يضغطوا على المحكمة برضه، وبعدين بيبقى باين خط حازم وبنعالجه معاه بخط سياسى. بالنسبة لجامعة إسكندرية العملية بسيطة من الناحية القانونية مفيهاش مشكلات، يعنى الأولاد اللي على نور الدين هيرى إن فرص الإدانة لهم قوية، هيساعدنا جدا فى العملية.

سرى للغاية

الحقيقة على نور الدين يعنى! لكن لو محمد عبد السلام، كان يبطلق سراحهم على طول ويقول: إحنا طلعاكوا وهايمسكوا البوليس والحكومة هي اللي حاتمسكوا! فاللى يرى إن احتمالات الإدانة بتاعتهم قوية، التانيين اللي عليهم حاجة بيقول: أنا مش هقدمهم لكن يحط فى القرار نفسه بتاع النيابة. وده ممكن قوى قانونا وجايز إنه يرى إنهم مايحاكموش جنائيا لكن يحالوا الى الجامعة لمحاكمتهم تأديبيا. بغدادى جاهز على طول، بمعنى إن لما بتروح له بغدادى بيقدر يخلص العملية نهائيا وبطريقة قانونية جامعية خالص.

هو اللي احنا بنبحثه بالنسبة لبتوع جامعة القاهرة، جامعة القاهرة هم ٣ فئات.. الفئة اللي طلعت على الكوبرى دى برضه بنقدر بنتحرك فيها النيابة طبقا بنفس الطريقة.

المجموعة اللي اجتمعت فى كلية الهندسة يوم ٢٣، ودول اللي حرضوا فيها على الإضراب والمظاهرات، وده نقدر نسائلهم تانى جنائيا بناء على كده.

داوود: نحولهم للتحقيق.

شقىر: نقدر نحولهم للتحقيق وجلسة تأديبية على طول بنفتحها. بتيجى المجموعة الثالثة: التى كان لها نشاط فى الماضى ولكن لم تتحرك هذه المرة، ولم تدخل فى تنظيم هذه المرة واللى جزء منهم له خطورته.

عبد الناصر: مجموعة الشيوعيين بتوع كلية العلوم بتوع الطلوجى ولييب شعت والولد بتاع كلية الاقتصاد شرف.

شقىر: شرف ده تخرج يافندم خلاص.

عبد الناصر: غار فين؟

شقىر: ماهو ده بقى مانعينهوش.

عبد الناصر: أنا مفهومي نعتقله، ده هو اللي عمل عملية فبراير كلها الولد ده.. مش كده؟

سرى للغاية

شقيير: هو مع ال ١٢.

عبد الناصر: لأ.. هو اللي راح كلية الهندسة وقال لهم ويتاع.

شقيير: أنا كنت بأسأل الدكتور فتح الله الخطيب عميد الاقتصاد عنه، قال لى: ده تخرج خالص يعنى، فهم دول زائد الكذا ولد..

عبد الناصر: طلع كحيان قوى!

شقيير: هو كلمه آه.. عاوز يبين التأييد وأنا سألته إيه؟ قال لى أنا الكلمة بتاع فريد عبد الكريم خشيت إنها تفسر إن الجامعة فيه منها موقف نحو النظام أو نحو الرئيس، بالعكس أنا قمت أفسر وأؤكد.

عبد الناصر: محدش فهم اللي عايز يقوله! (ضحك)

أصوات: (ضحك)

عبد الناصر: إنت بعت لى إنه اتكلم فى اللجنة المركزية، قلت: خلاص أخليه يتكلم فى المؤتمر.

أبو النور: هو كويس قوى.

عبد الناصر: والطلبة مايجبهوش كمان!

شقيير: لأنه هو بيقف موقف حاسم، وكان غير مرتاح للطريقة إن احنا بنريحهم.. ماكنش مرتاح.

عبد الناصر: هو الواحد حب يعاملهم كرجالة، الشاطر ده جه عندى فى البيت وكان كلامه يعنى لكن الحقيقة الثقة أكثر من اللازم! وأنا بدى أقول حاجة: أنا مثلاً جيت خالد سألته، خالد فى كلية الهندسة اللي فيها العملية كلها، وخالد نبيه ويعرف مجموعة كبيرة من الناس ورياضى لكن مش داخل فى السياسة وأحسن.

سرى للغاية

شقىر: وهو محبوب منهم.

عبد الناصر: وحتى مارضىش يدخل منظمة الشباب، قلت له: ليه؟ قال لى: منظمة الشباب مكروهة وناس متعالين وإذا دخلت فيها حاضرك! (ضحك) ولهذا أحسن ما أدخلش المنظمة، قلت له: خلاص ماتخشش.

هو بيقول لى ليه مجموعة أصحاب كتير بيعقد معاهم، فيقول لى: إن الموضوع طبقى - كلامه هو يعنى - وده أنا رأبى أيضا قعدت أناقشه فطلع الآخر من أصحابه بيقولوا إيه: ٥٠% عمال وفلاحين؟ مين الفلاحين اللى يبجوا؟!!

هو حتى بيقول لى: إن الغناى.. قلت له: لأ.. قول الأغنياء مش الغناى.. (ضحك) الغناى هم اللى ليهم موقف، إيه ٢٠ جنية ومش فاهم إيه؟!!

فمن مناقشتى معاه، الموضوع الطبقى قطعاً فى الموضوع له تأثير! الفقراء قوى عندهم حقد طبقى عايزين يهدوا الدنيا على اللى فيها! لما ببشوفوا واحد جاى بعربية عايزين يحرقوا العربية باللى فيها لأن عنده قميص واحد! مرة واحد بعث لى جواب مع خالد قال لى فيه: إنه بقاله ٣ أيام ماكلش، يعنى لموله جنية فى البلد وجه بقاله ٣ أيام ماكلش وبيبات فى جامع!

أنا بعث دخلته فى المدينة الجامعية وعملت له إعانة، فى الآخر بقى راح لخالد وقال له، يمكن قعد ٣ أيام متردد يديله الجواب، ساعات برضه يبقى الواحد.. فالآخر إداله الجواب شفت أنا الجواب. فيه ناس بهذا الشكل الحقيقة كتير وعايزين يهدوا الدنيا، وده السبب إن أنا قلت ندى مليون جنية للصندوق والكلام ده؛ لأن فيه مشاكل الحقيقة بتولد حقد طبقى، وإذا وجدوا فرصه عايزين يحرقوا البلد باللى فيها يحرقوها!

يعنى فيه أولاد تانيين اللى هم مثلاً فى كلية الحقوق وراحوا ناس يتصلوا بهم ومارضىوش، السنة اللى فاتت، وقالوا: ده إحنا لولا هذا النظام مكناش دخلنا الجامعة، وفيه ناس فى الهندسة أيضا بهذا الشكل، وفيه ناس فى كل حته بس ماهماش كتلة.. يعنى ناس أفراد.

وبعدين هو فريد حسنين ومكادى شتموهم فى المؤتمر، يعنى إحنا كنا شاكين فى فريد وأنا الحقيقة فضلت أديله الكلمة فى المؤتمر عن نهنوش - أنا مادتيش الكلمة لنهنوش أنا عارف ضامن نهنوش - فضلت أدى الكلمة لفريد، هو برضه معاه مجموعة وكلام بهذا الشكل!

سرى للغاية

طبعا فيه مجموعة شيوعية أيضا فى كلية الهندسة فيه واحد اسمه عباس، النقطة دول لما حاتجى تفتح الجامعة مش هايعملوا حاجة، ولكن حايتهزوا أول فرصة ماتعرفش إيه الفرصة! يعنى الدور ده كان قانون التعليم حايتهزوا أى فرصة وبعدين يعملوا حاجة. وبعدين لما تمسك مجلة الحائط فى كلية الهندسة والعلوم، الحقيقة اللي بيحط فيها يالما اليمينيين خالص.. الرجعيين، يالما الشيوعيين الصينيين.. جيفارا والكلام ده! بتلاقى فى كلية العلوم الشيوعيين، وبتلاقى كلية الهندسة الرجعيين وكلية هندسة عين شمس خصوصا الرجعيين. بتلاقى مثلا فى صحيفة الحائط ابن الدكتور سويدان فى هندسة القاهرة كاتب بيهاجم هيكل فى صحيفة الحائط! كلام فيه غمز ولمز، مين الدكتور سويدان؟

فهى العملية هتبقى لها أبعاد ومتعرفش هيحصل فيها إيه!

أبو النور: ماهو لابد إن احنا نمشى فى نفس الوقت ده على أساس تنظيمى، وانتقاء أفراد نلهمها ونربطها صحيح.

عبد الناصر: لأ.. هو أنا قصدى مش كده يعنى، وده موضوع طويل الأمد وده ماشيين فيه ولو إنه صغير، لكن قصدى إذا إبتدينا سياسة الحزم لازم نبتدى سياسة حزم على مستوى كبير إن البلد كلها بتحس. وده السبب إن أنا قلت فى المؤتمر: إن فى سنة ٥٤ اعتقلنا ١٨ ألف وفى سنة ١٩٦٥ اعتقلنا ٥٠٠٠، والسنة دى اعتقلنا ثلاثة! معناها إن احنا نقدر وفعلا لو الواحد اتهمز كان ممكن قوى اعتقال.

الحقيقة لما بنيجى نعمل عملية زى بتاع الطلبة دى، أنا فى رأى إن العملية لا تكون قاصرة على موضوع الطلبة، لازم البلد كلها بتحس ب tone واحد؛ مبقولش المعادين، بقول: اللي بيتحركوا وراء الشيوعيين لازم نمسكهم، واللى بيتحركوا وراء أحمد سعيد لازم نمسكهم، معروفين فيه فى الزقازيق الناس اللي بيتحركوا نمسكهم، ودول موجودين كلهم وتبقى العملية بقى واحدة فى البلد كلها.. البلد كلها بتحس إنه فيه tone واحد.

وبعدين الطلبة اللي حانفصلهم لازم نمسكهم، لأن إذا ممسكناهمش هيروحوا الجامعة ويدخلوا ويقفوا يخطبوا ويهيجوا الناس؛ بتمسكهم تعلمهم معسكر بتديهم لفوزى، وعلى هذا الأساس الحقيقة بتبقى العملية بقى فيها عملية مواجهة، وإن إذا أى حد عمل حاجة أضربه بالرصاص يعنى بيبقى باين كده وبنقول كده.

سرى للغاية

وبعدين أيضا لازم نشوف آباءهم، ولازم زى ما عملوا فى بولندا بالنسبة للآباء
نعمل بقى بالنسبة للأولاد. فى الفترة اللي فاتت أنا كنت رافض كلية ألقط عملية عملية،
ليه؟ مكانتش هيبقى لها معنى إن مع عملية جو الطلبة وعملية الجو ده، وكان أنور
بيجى يلح على ساعات نشتغل، يعنى أنا مش فايق أصلا بنشتغل عمل سياسى!
والحقيقة دلوقتى أنا فى رأى يعنى إحنا كان تقديرنا إن فى نصف ١٩٦٩ بنقدر
نعبر وتبتدى العمليات، ده كان تقديرى مع قيادة الجيش، دلوقتى أنا بقول: مش ممكن
لأن الكلام ده كله مبنى على أساس الحاجات اللي رحنا موسكو هتيجى، يعنى إذا
كانت ماجاتش بيقى عملية سنة ١٩٦٩ مش حانقدر نعمل حاجة! هتيجى سنة ١٩٧٠
وإحنا فى موقفنا اللي إحنا فيه النهارده. فى نفس الوقت حيزداد علينا الضغط داخليا،
قطعا فيه عناصر أجنبية بتشتغل أنا مابقولش يعنى إنها خطيرة لكن حاتشتغل بقوة،
والهدف هو إثارة الـ trouble.

وبعدين الكلام اللي فى الأوبزرفر وأنا أتعمد إن أقراه، وجيببت لهم المحكمة بتاعتهم،
أما قرئت الكلام اللي فى الأوبزرفر يعنى أنا طلبت وقرئت الكلام ده يعنى تانى يوم فى
المحاكمة وثالث يوم؛ منشور فى الجرايد اللي شايل عناية، اللي شايل سلاح هجومى
واللى شايل طوبة.. شايل سلاح هجومى وحكم شهرين أو ثلاثة شهور عليهم!
لكن إحنا بيتتهز النظام واتهزت الدنيا، لكن العملية الحقيقية السنة اللي جاية
هيبقى موقفنا أصعب بكثير لأن حانواجه بضغط أكبر قوى. متهايلى مش بس اليهود
هيصرفوا يعنى إذا صرفوا ٢ مليون أو ٣ مليون علشان يهزوا الدنيا هنا أحسن لهم لأنها
ثمن طيارتين! الأمريكان إذا صرفوا ١٠ مليون دولار تمن طيارتين ١١١ من اللي
بيقعوا فى فيتنام! فقطعا هايجصل عمليات كبيرة. دلوقتى إحنا الحقيقة مفتحين فى
الجيش جدا يعنى العملية أنا يوميا بوالها والعملية ماشية مضبوطة.

ثانيا: أى واحد بيعمل حاجة فى الجيش بيحببوا ناس بيقلوا عليه، بعدين الواحد
لازم يروح الجيش مرة واثنتين وثلاثة أكثر. الحقيقة أنا مقدرتش أروح السنة اللي فاتت،
وبعدين لازم أيضا بتوع الجيش نشرح لهم ليه إحنا مابقومش بالعمليات؛ لأن كل واحد
بيقول: الله جات لنا أسلحة وعندنا دبابات أكثر من الأول وعندنا مدافع أكثر من الأول،
طب ليه واقفين؟! لازم الواحد يشرح.

بيجى بعد كده الحقيقة الجبهة الداخلية، يعنى هى العملية الأساسية إذا كان هيبقى
نزناز.. وبعدين إذا أثير العمال مع الطلبة بيبقى.. وده الهدف، وبعدين إحنا عندنا
عمليات العمال اللي هى قصولة العلاوات.

سرى للغاية

برضه العمليات اللى اتعملت عملها زكريا، من اللى اتعمل بيأخذ علاوته ٢٥٪ بس من العلاوة أو النص، وبعدين الأرباح أيضا! وأنا متهيألى إن العمليات دى لو العلاوات هتطلع إيه والأرباح هتطلع إيه! إحنا جايين لغاية النهارده أسلحة بألف مليون روبل يعنى ألف مليون دولار وطالين أسلحة بألفين مليون دولار يعنى ببطلع المجموع يمكن ٣ آلاف مليون دولار، والواحد أمله طبعا إن بعد كده يقول لهم يتنازلوا عن ثمن جزء.

لما بنصرف مبلغ فى هذا الحقيقة لازم..

السادات: مايساويش.

عبد الناصر: وبعدين الحقيقة الجبهة الداخلية بعد المؤتمر القومى وبعد القرارات، اللى يعنى إنه بيطلب بضرب القوى المضادة وعزل.. وعزل.

يبقى لازم إذا عايزين نعمل عملية يبقى لازم نعمل عملية صح، ماأجيش أعمل للطلبة واللى بيحرضوا الطلبة أسبيهم! ده الحقيقة اللى أنا بتصوره، بتيجى العملية كلها مع بعضها، البلد كلها بتحس بنعمة جديدة.. كل واحد الحقيقة..

السادات: يعرف حدوده.

عبد الناصر: يصحى، وأنا رأيت برضه فيه ناس تخاف ولا تختشيش! يعنى العناصر اللى مكانتش بتتكلم قبل كده وبتتكلم لأنها متصورة إن الحكم عاجز يعمل شئ.. فيه تصورات بهذا الشكل.

أبو النور: هو دون شك زى سيادتك ما قلت، دى مع شوية الراحة الاقتصادية تريح الجبهة.

عبد الناصر: واية الراحة الاقتصادية أنا مش عارف بقى؟

أبو النور: لأ.. يعنى سيادتك قلت تتدرس دلوقتى على أساس، يعنى الاثنين مع بعضهم هيعملوا وضع كويس قوى.

سرى للغاية

عبد الناصر: مع العمل السياسى؟

أبو النور: آه.. مع العمل السياسى.

عبد الناصر: وبعدين هو العمل السياسى أساسى، وبالنسبة للزيارات والعمليات دى يعنى إحنا الحقيقة لازم بنقوم بهذا الدور، العمليات التنظيمية ولم الناس والكلام ده بيلم يعنى.

السادات: آه.. طبعاً.

عبد الناصر: يعنى الواحد بيفتكر أول الثورة أيام موكب التحرير كان يبطلع، والصعايدة والفلاحين ونسمع مشاكل ونحل بدون ما ندى الناس فلسفة ولا كلمات معقدة! الحقيقة الكلام المعقد اللى هو الشعارات دى بيبقى له أثر عكسى يعنى بل بالعكس بتستهلك؛ يعنى عملية الكفاية والعدل استهلكت لغاية ما بقت الناس وحتى فى المدارس والكلام ده كفروا بالتعبير اللى هو يعنى بيبقى كلامنا بلدى وبسيط وناخذ مع الناس وندى.

فوزى: هو رأى ممكن بلورة إيه سبب متاعب الناس، وبعدين نشوف هل مواردنا تسمح الى الحد الفلانى نذهب الى أبعد منه كمان شوية؟ مثلاً إخوانا الاقتصاديين يدوروا لنا مخبيين شوية موارد هنا وهنا، ثم فيه موارد فى الدولة وعمليات هتجيب عائد على طول زى مثلاً حكاية الصرف اللى بيقول عليها لبيب؛ ده المحصول وهو مزروع نفسه بيزيد مش فى السنة اللى جاية فى الحال.

اختيار مواطن الصرف برضه ندقق فيها زيادة، ويطلعوا لنا موارد لأن الناس مش حاتستنى شهور طويلة لحد ما نبحت ونقرر ونحول للجنة والحكاية دى! وفى كل قطاع ممكن جداً وممكن من الآن معروف إيه مواطن التعب، يبقى الجزء الإدارى سهل نتناوله نسبياً، واللى مانقدرش عليه نواجه الناس ونقول لهم: ده عاوزين نعمله لكن مش قادرين، يعنى لابد نخلى الناس هم كمان يشاركونا بالنتيجة اللى بنصل إليها، يعنى مايقاش مسألة فرض.

عبد الناصر: لأ.. الناس طبعاً مستعدة الى الـ limit المعقول، لكن بدون limit الناس مش مستعدين.

سرى للغاية

فوزى: لو جالنا واحد ييجى يقعد ده اللي أقدر عليه وده اللي ماأقدرش، وهعمل زيادة شوية على اللي هقدر عليه، ويبقى الناس مقتنعين. ويمكن دى أكثر نقطة حساسة اللي حاتشد الناس الى الحكم أكثر وتخليهم يستحملوا شوية؛ لأنه مهما عملنا برضه هيبقى لنا جزء من المشاكل مايبينحش، فعلشان يصبروا علينا لازم نتبادل وباهم الرأى أكثر شوية.

عبد الناصر: يبقى على هذا الأساس فتح الجامعات فى تصوركوإمتى؟

أبو النور: يعنى بعد العيد بشوية.

عبد الناصر: مش بعد العيد على طول يعنى؟

شقىر: يعنى يتوقف على محكمة أمن الدولة يافندم هتخلص إمتى، وأنا أعتقد إنه فى ظرف أسبوع أو ١٠ أيام بعد العيد تخلص.

استينو: هو لو سمحتلى سيادتك، يعنى الفكرة إن الطلبة اللي تفصل تكون فى أقل حيز يعنى من الناس اللي يكون مثبت عليهم ومفيش أمل منهم. يعنى أنا قعدت مع أعضاء هيئة التدريس، فإن لو انفصل ناس مظلومين يمكن دى تعمل إثارة أكثر ماتعمل فايدة، وفى تقدير بعضهم إن ممكن من كل كلية خمسة ستة كفاية بتخوف الناس، من الناس اللي غير صالحين ومفيش فايدة منهم.

الحاجة الثانية إنه يحسن من دلوقتى إن يبقى فيه لقاءات مع أعضاء هيئة التدريس من تنظيم بتاع هيئة التدريس، وبعدين يبقى لقاءات مع الطلبة قبل الافتتاح. يعنى يمكن نجيب الأول سنة أولى وبعدين سنة ثانية وبعدين تالته وبعدين رابعة؛ علشان يبقى فيه نوع من التفهيم علشان لا تفتح الجامعة فجأة وييجوا كلهم مرة واحدة، ويمكن يبقى فيه برضه نوع من الإثارة لما يلاقوا عدد كبير مفصول أو حاجة زى كده؛ علشان نستعد من دلوقتى بحيث لما تفتح الجامعة يبقى ضامنين ١٠٠٪ إن شاء الله يبقى كل شى منتظم.

سرى للغاية

شقيير: هى الأعداد مش ضخمة يافندم اللى موجودة، يعنى بالنسبة لإسكندرية الإحصاء اللى قدامنا اللى مقدمين للنيابة فعلا ويبدو إن التهمة ثابتة عليهم وهيقدموا حوالى ٤٥ واحد، دول اللى يعنى يفصلوا بناء على..

السادات: من الجامعة وثانوى؟

شقيير: لأ.. كلها جامعة إسكندرية لأ.. ثانوى لأ.. وبعدين فيه استفسار أو استعلام عن ١٨ واحد موجودين يعنى بدنا نتأكد من وضعهم، وبعدين فيه ناس حوالهم كلام والنيابة ماسكة بعضهم وأفرجت عنهم.. الى آخره. فإحنا منتظرين تقرير من النيابة دول ١٩٠ واحد فى اعتقادى ومش هيبقى فيه منهم ممكن يدخل العملية أزيد من ٣٠ أو حاجة؛ ففى جامعة إسكندرية كلها حايبكون حاجة حوالى ٨٠ واحد.

عبد الناصر: كلية الهندسة؟

شقيير: كله.. كلية الهندسة وزراعة وتجارة وحقوق وكله. فى جامعة القاهرة العدد أقل اللى احنا بحثناه النهارده يعنى القاهرة وعين شمس وأسبوط.

أبو النور: لأ.. برضه فيه كلتة شيوعية مع كتلة يمينية بتوع مجلة الحائط، كمان فيه عدد مش شوية.

شقيير: مش حايزيدوا من الجامعة عن ١٠٠ واحد كلهم.

أبو النور: يعنى هو المشكل مش عدد الطلبة، طالما إنه داخل محكمة، وإحنا بنقول إيه؟ بناخذ العملية ليست تعسفية، عملية بإثباتات؛ واحد دخل محكمة ومحامى وكل شئ وأدانتته! دون شك إن هنا عملية عادلة بحكم عادل. جزء آخر داخل مجالس التأديب وعليه إثباتات أيضا كمجالس تأديب تقدر تدينه.

الإدانة بقى يمكن قد تختلف من واحد الى آخر، الجماعة اللى هم عنصر قيادى للشغب مستمر دون شك يمكن أن يفصل تأديبيا، وفيه عناصر أخرى ممكن اللى يأخذ سنة اللى يأخذ حاجة من هذا القبيل تتحاسب على هذا الوضع.

سرى للغاية

حقيقى إنت بتقول لى لو جزء كبير لو اتاخذ واتفصل ببقى له رد فعل، ما هى دى برضه لازم تناقش إن وجوده أصلا هو عنصر شغب ١٠٠٪ وقيادى فى الشغب ١٠٠٪، يعنى هيستى يمكن يهدى مثلا بعد مايفتح الجامعة شهر اثنين ويرجع - زى ماسيادة الرئيس مايقول - أى مناسبة حاشعلها مرة ثانية! هل إحنا حانسمح إنه هو يكون متواجد علشان يشعل لنا العملية مرة ثانية فى أى مناسبة؟! إحنا قدرنا نسيطر النهارده محدش عارف بكره يحصل إيه؟! يعنى إحنا أخذنا من ضمن العناصر الللى إحنا حكمنا عليها دى جاية من قلب الجامعة بواسطة عمداء الكليات مقدمين تقارير عن هؤلاء الناس.

عبد الناصر: آه.. هو رد الفعل هو طبعا على أد ما هييان الحكم للناس على أد ما هييان رد الفعل، أنا رأى فى هذا، طبعا الأولاد بيتصلوا ببعض فى البيوت وبالتليفونات ومبيتصلوش بس فى داخل الجامعة، وبعدين أنا شفت اتصالات مثلا واحد من عيلة الفقى بيتصل هو الللى طالب من الأولاد الللى فى المؤتمر إنهم يقفوا فى المؤتمر ويقولوا: إن هم ممتنعين عن الكلام إلا إذا حصل إفراج عن زملائهم المعتقلين!

شقىر: من عيلة الفقى طالب يافندم؟

عبد الناصر: مش عارف هو طالب فى دراسات عليا يظهر، لكن باين إنه من عيلة الفقى، واخذ بالك من العملية؟ عملية تلفت النظر! إتصل قالوا له: طيب. وده قال له: طيب. وده قال له: آه! هو الحقيقة فريد عبدالكريم لم شوية الجيزة وماشى. الللى بقوله بقى: هيحصل عمليات على أساس إنهم هيروحوا بيوت الأولاد إذا اتسابوا؛ ولذلك أنا بقول لازم يتأخدوا. بعد كده طبعا قد يروح بعض من أخواتهم أو أهاليهم زى الولد ده الللى راح شبين الكوم ده هو وأخوه..

شقىر: عجور.

عبد الناصر: آه.. ممكن تحصل عمليات للإثارة، لكن تعالى بقى كلية هندسة القاهرة ٧٠٠٠، أى مؤتمر الحقيقة الللى بيحضره ٦٠٠ أو ٧٠٠ أو ٥٠٠! وبعدين الجماعة السفلة عدد قليل الحقيقة الباقيين بيقفوا قاعدين يعنى بيتفرجوا ويبسقفوا ويتاع لكن متابعين، بقية الـ ٧٠٠٠ مالهومش دعوة بالعملية كلها.

سرى للغاية

لازم أساسا نخط تقدير إنه ممكن يكون فيه رد فعل، وبعدين لازم نحسب ما هو تصرفنا إزاء رد فعل؟ وبعدين لازم نكون متأكدين إذا ابتدينا بالشدة يبقى بعدين فى السكة لا نستطيع إن احنا نرخرخ.. يبقى هنمشى فى الشدة الى أقصى مدى!

وبعدين موضوع إسكندرية، أنا قلت لشعراوى مفيش مظاهرات فهم منعوا بتوع كلية الهندسة، اللي حصل فعلا فى الموضوع إن الأولاد رجعوا اعتصموا، وبعدين اتصلوا بطلبة اتحادات الطلاب فى ثانوى وعملوا لهم اجتماع فى حنة أظن كلية العلوم ولآفين فى إسكندرية، واتفقوا مع مدارس ثانوى على أساس يعملوا مظاهرات يوم الاثنين. ده الكلام بتاع إسكندرية، بتوع الجامعة اتصلوا بثانوى وقالوا لهم بقى: إحنا قمنا علشانكم وعلشان مطالبكوا وإنتم ساكتين وكذا.. فالأولاد كأولاد طلغوا فى العملية!

النهارده رجعت المدارس مفيش حاجة خالص.

شقىر: كل المدارس كويسة النهارده.

داوود: الحقيقة المعاملة بالنسبة للجامعات والمعاهد العليا متهياى كلها ماتبقاش متساوية، يعنى فيه معاهد عليا متناثرة فى كل حنة يعنى فى أماكن متفرقة، ويمكن لا فى فبراير اتحركت ولا دلوقتى اتحركت؛ لأنهم أعداد قليلة وموجودين فى وسط بلاد مفيش عوامل مشجعة على إنهم يدوهم حافظ أنهم يتحركوا. بيتهياى ممكن نعمل تجربة منهم وينفتحوا، على أساس إن افتتاحهم وهدوئهم وانتظامهم فى الدراسة بيدى تأثير بالنسبة للباقي.

وبعدين فيه بعض جامعات برضه ممكن نبادر بها أو نخلص أمورها بدل ما تفضل كلها مقفولة مدة طويلة؛ لأن أنا متهياى إن فيه هتبتدى عملية قلق، بعد الناس ما كانت كلها متحمسة للموقف بيتدى كل أهالى هؤلاء الناس بيتدوا عملية قلق على مستقبلهم وقلق على استمرار بقائهم وهتبتدى فيها كلام.

وبعدين عملية فى رأى لازم نشترك فيها جميعا، يعنى لازم الاتحاد الاشتراكي بكل مستوياته يشترك فى هذه العملية. الأولاد النهارده فى بيوتهم عند أهاليهم فى البلاد، لجان الاتحاد الاشتراكي على مختلف مستوياتها لازم تتحرك فى هذه العملية، بنجيبهم وبنجيب أهاليهم، تعمل مؤتمرات منهم ومن آبائهم على مستوى المركز وعلى مستوى المحافظة، وتبعنا لنا تقارير عن هؤلاء الناس والاتجاهات؛ يعنى على غرار الحركة اللي كانت اتعملت فى الصيف، وإدنا لنا بعض تصورات عن الموجودين دول.

سرى للغاية

ببقى حركة شاملة وكاملة لكل العناصر، وفي الوقت نفسه يبقى حتى اكتشاف لموقف الأولاد دول شكلهم إيه النهارده؟ أو إيه الأثر اللي هيترتب عليه عند فتح الدراسة؟ ممكن يعنى يدونا تصور من هذه العملية، وبعدين نحرك أهاليهم لأن أهاليهم فى الواقع كل واحد بعت ابنه وخلص انتهت مسئوليته عنه، لما يتحركوا دول ويستجيبوا للاتحاد الاشتراكى..

عبد الناصر: عمل كده أنور فى المنوفية، الحقيقة جاب الأولاد عمل لهم مؤتمر فى المنوفية.

السادات: كلهم آه.. عملت لهم مؤتمر يوم الخميس اللي فات.

داوود: دى مفيدة جدا الحقيقة.

السادات: وهم بيؤكدوا النقطة اللي سيادتك قلتها ياريس: إن الأولاد دوكم عندهم إمكانية الاتصال مع بعض بره الكلية؛ وعلشان كده بيقدروا يرتبوا حاجات. يعنى أنا بأسألهم بقول لهم: طب إنتو قاعدين تعملوا إيه؟ يعنى مابتحركوش ليه؟ فيقولوا: إحنا بنفاجأ بالأوضاع مفيش اتصال معاكوا مالناش اتصال مع التنظيم السياسى ولا مع حد، وبعدين دوكم متصلين ببعض، وبعدين حتى بيطلعوا من الكلية بره الكلية بوسيلة اتصال سهلة.. عربياتهم ونواديهم وبيوتهم، الأولاد دول بيطلعوا من الجامعة مساكين اللي فى شقة واللى فى مدينة جامعية، يعنى حالتهم صعب قوى.

عبد الناصر: آه.. لكن ممكن نتحرك فى المحافظات، المحافظين كمان ممكن يقوموا بدور.

أبو النور: هو فيه عندهم ترتيب بتاع معسكر الصيف، وكانوا عاملين رابطة بعض الطلبة بينفهم كعناصر قيادية يودوهم معسكر القيادة فى فترة الصيف، على أنهم يبقى فيه اتصال بينهم وبين بعضهم. بس إحنا نمشى العملية لأن العملية بعد ما سابوا محافظاتهم وجم هنا، إتلق جزء منهم والجزء الباقى اتساب عايز إعادة ربط مرة ثانية، والمحافظين يعيدوا هذه العملية مرة أخرى مع الطلبة ومع أولياء أمورهم؛ لأن فعلا عملية أولياء أمورهم - زى ما قال الأخ ضياء - حتمية؛ فعلا الأب بيعت ابنه وخلص ونسى موضوعه وانتهى! لا بد يدخل فى الموضوع ويعرف إن ده مستقبله هيبضع وإن بلده

سرى للغاية

حاتضيع وكل هذا الكلام، ويبدخل أبوه معاه فى هذه العملية، وزى سيادتك ما قلت:
الجماعة بتوع بولندا مشبوا عن طريق أولياء الأمور.

عبد الناصر: بتقوموا بالعملية دى؟

داوود: نقوم بالعملية دى.

عبد الناصر: هو الحقيقة لو بنحل موضوع الجامعة بعد العيد على طول، يعنى اللى كنت متصوره
إن احنا هنفتح الجامعة بعد العيد.

أبو النور: عايزه بس العملية دى إحنا اللى موقفنا إحنا دلوقتى الآتى: عملية أمن الدولة كمحكمة،
إذا كانت المحكمة تقدر تخلصها والله الجمعة الجاية.

شقىر: هى ممكنة.

أبو النور: ياريت هى لو قدرت تخلص العملية بسرعة هيبقى بعد العيد على طول.

شقىر: فى إنجلترا نفسها تانى يوم.

الشافعى: ماهى مش فى إيدنا دى يعنى.

داوود: يعنى إحنا برضه هنقدم للمحكمة، وهيروح محامين وهيدفعوا دفع وهيطلبوا التأجيل
وهاتوا الشهود وضم ملفات، وكل الوسائل التحايلية اللى بتحصل فى المحاكم متوقع!

عبد الناصر: بس فى إنجلترا خلصوا تانى يوم.

داوود: عندهم نوع خاص من المحاكم المستعجلة، لو مش أمن الدولة عندنا العادية بتقعد
بالسنتين!

سرى للغاية

عبد الناصر: يعنى فى إنجلترا ده حتى مش النيابة، بيروح ضابط البوليس يقدم على طول والمحكمة تحكم على طول فى عمليات بهذا الشكل.

السادات: والله لازم يكون عندنا هذا التشريع والله ياريس.

داوود: أنا كان فيه مظاهرة وأنا فى ثانوى قعدنا نتأذب فيها للغاية ماتخرجت!

السادات: بس ماأفكرش محكمة أمن الدولة هتمشى دلوقتى بنفس الروح، خاصة لو وضح لها.. الأولاد نفسهم بعد العيد على طول الطلبة مش عايزين اجازة نصف السنة.. مش عايزين اجازة.

أبو النور: إحنا جاهزين وممكن نبتدى قبل العيد، بس هى لو المحكمة خلصت يعنى لو قدرنا نجيب دايرة مختارة كويس وتتفهم الوضع وتتهى الموضوع بأسرع وقت ممكن، وحجم العملية باين.

الشافعى: أنا عندى دخول الطلبة شئ ووجود الناس فى الإجراءات شئ آخر، على أساس إنك إنت حددت حجم العملية وإن دول النيابة متولياهم والقضاء متولياهم.

داوود: هو فيه قدر نقدر نتحكم فيه وهو إعلان قرار الاتهام، إعلان قرار الاتهام يبقى معروف مين اللى هيتقدم للمحكمة ومين اللى هيتقدم للمحاكمة التأديبية.. ده قاطع فى تحديد مراكز. بعد كده المحكمة تنتهى؛ لأن فيه احتمال المحكمة تدى براءة لحد برضه، ويعدين الحد ده اللى هياخد براءة أنا مش حاسييه بقى حاتخذ وياه إجراء تانى تأديبى أو إجراء آخر.

شقيير: هو الفتح يافندم قبل المحكمة ماتصدر، المحكمة بعد كده هتبقى بتشتغل، واحدة من الاثنين ياحاتشتغل علنا ياحاتشتغل سرا، إذا المحكمة بتشتغل علنا هيبقى عنصر إثارة مستمر.

عبد الناصر: يعنى بتنتشر فى الجرايد؟

سرى للغاية

شقىر: آه.. ما هو ده اللى بقوله، ويعنى إذا اشتغلت سرا هبقى تفريخ اشاعات ماله حد!

عبد الناصر: ببقى كآى قضية.

الشافعى: كآى قضية يعنى مايقاش فيها إعلان.

عبد الناصر: يعنى طب هناول نخلص منها قبل العيد.

شقىر: دول ٤٥ واحد.

فوزى: افتتاح الجامعات.

عبد الناصر: معرفش والله، ما أنا بسأل هذا السؤال.

الشافعى: هو السؤال اللى بيتردد فى كل بيت.

استينو: هو السبت ٢٨ ديسمبر لو أمكن ببقى كويس، هو العيد حايلخص أظن يوم ٢٤ يبقى السبت اللى بعده.

أبو النور: هى العملية بالنسبة للتأديب ممكن يعنى على نور الدين فى نهاية الأسبوع ده أو الأسبوع اللى الجاى يكون مخلص قرارات الاتهام بتاعته، الناس اللى بيحدددهم للجامعة لتأديبهم إدرايا ممكن الأسبوع الجاى ينتهوا، ويبقى فاضل المتقدمين للمحكمة. فى رأى دول برضه من العناصر الرئيسية، متهىالى برضه لو قدرنا نخلصهم قبل العيد.

داوود: هو اللى هيعطهم التقارير بتوع الطب الشرعى.. تقارير الطب الشرعى اللى بتحل أسلحة واللى بتشوف القتلى، دى بتأخذ وقت كبير قوى لأنهم بيعتوا المعامل طولالات البال جدا! هى دى يمكن اللى هتأخر شوية.

أبو النور: بس فيه نقطة ثانية.

سرى للغاية

داوود: لا.. ما هو مايمكنش هيطلع قرار الاتهام ولا يقدمها للمحاكمة من غير ما يكتب لأنه بيحطها ضمن القرار، بيقول ملحوظة ورد تقرير الطب الشرعى وبيقول كذا، ملحوظة تانية بيقول ورد كذا ده فى نفس تقرير الاتهام؛ لأن مش ممكن يقدمها لأن ده جزء من إجراءات التحقيق طالما إنه معلق ببقى لسه مانتهاش إجراءات التحقيق.

عبد الناصر: هو ممكن الاتصال بيهم.

شقىر: آه.. الطب الشرعى ممكن بنشوف.

داوود: يعنى هو أبو زيد يقدر يتصل بوكيل الوزارة للطب الشرعى ويقدر يحدد الموقف بالنسبة لكل هذا.

أبو النور: على جاء إمبراح وكان متصل بعادل فى إسكندرية، على أساس إنه يقدر يخلص العملية.

عبد الناصر: لأ.. هو على نور الدين الراجل ماشى ومتعاون.

أبو النور: وكان بيفهمه النقطة دى على أساس إنه المتأكد إنه يقدمه يحوله للنيابة. هو بس فيه نقطة تانية كنا عايزين ناخذ رأى سيادتك فيها، هل الأحكام بالنسبة للمحاكم السجن تأثيره مثلا؟ يعنى طالب اتحكم عليه بست شهور سجن أو سنة سجن، هل الأفضل إنه يقعد فى السجن ولا يأخذ غرامة ويتجند برضه؟

شقىر: هو لو بعدنا عن السجن ببقى أحسن.

أبو النور: ببقى له تأثير مختلف خالص.

داوود: هى معظم قضايا التجمهر طبقا للقانون اللى مابتعش فيها جنایات، اللى بتقع فيها جنایة بتأخذ حكم جنائى فيبقى سجن وخلافه، اللى بتبقى تجمهر بس وماحصلش فيها جنایة بتأخذ حبس وغرامة ويتقدم لمحكمة أمن الدولة الجزئية.

سرى للغاية

السادات: لأ.. إذا كان فيه قتلى ماتوا؟

داوود: معرفش هل هم عاملينها وحدة واحدة.

شقيير: قضية اعتصام وفيه قضية تظاهر.

داوود: فهنا بتختلف، فيه تظاهرات حصل فيها قتل وحوادث فيها جنايات فدى بتأخذ بتسجل جنائية، فيه حوادث وقفت عند حد معين موصلتش لجنايات ما تأخذش هذا الوصف، يعنى طبعا هم عاملينها عدة قضايا مش قضية واحدة عدة وقائع يعنى.

عبد الناصر: طب هو فيه موضوع آخر، إذا أخذنا الموضوع كله تأديبي وبيننا إن احنا مش عايزين نقدمهم للمحكمة حتى لا يأخذوا حكم ويقضوا على مستقبلهم.

أبو النور: أنا أخشى إن هم يعنى العملية تبقى ماثبتش عليهم حاجة وهنفبركها! إحنا عايزين نوضح إن فيه نقط كثيرة واضحة ٢٤ قيراط؛ دى رايحة المحكمة يعنى ممكن تروح المحكمة، لكن الموضوع نقول: التهم الأولى وحرصا على مستقبل الأولاد خليناها حكم تأديبي.

داوود: وممكن فى قرار الحفظ نفسه بيقول: إن التهمة ثابتة ولكن بيبجى حيثية؛ وحيث إن دول طلبة وإن المحاكم التأديبية أجدى و.. و.. الى آخره، فأنه نكتفى بالمحاكمة التأديبية.

عبد الناصر: إحنا فى سنة ١٩٥٤ أنا فاكور مارضيناش نودى الأولاد للمحكمة خالص، بل بالعكس هم أبعدوا سنة وبعدين رجعوا تانى الجامعة بعد سنة، لم نقضى على مستقبل واحد فيهم. ولكن فصلنا الأساتذة فصلنا ٢٥ أستاذ، هم الحقيقة كانوا الأساس فى العملية.. الشاوى والشرقاوى وأمين بدر وأمين العالم.

سرى للغاية

الشافعى: ما دى تخش فى الإجراءات التأديبية يعنى.

عبد الناصر: آه.. فالحقيقة أنا بأحط العملية وإحنا دلوقتى ما حناش فى ١٩٥٤، يعنى إحنا دلوقتى سنة ١٩٦٨ الظروف برضه مختلفة والأوضاع مختلفة، ولكن لو ببيجى قرار الاتهام وبعدين يعنى إحنا بنتدخل وبنقول: خليها عملية تأديبية والجامعة بتفصلهم وياخدوهم فوزى بيعملهم معسكر فى أى حطة ويروحوا على هذا المعسكر، مش أحسن من إن أنا أوديهم المحكمة؟

داوود: يعنى يبقى جمعنا بين الشدة وبين الإنسانية.

عبد الناصر: وبنشرح هذا للأساتذة.

أبو النور: هو إذا طلع قرار الاتهام واضح وبنشرح بطريقة الإعلام؛ على أساس إن حرصا على مستقبلهم، وإنه لو راحو المحكمة هياخدوا أحكام بالسجن وأحكام تقضى على مستقبلهم وهيتحاكموا إداريا.

استينو: ده يبقى قرار من السيد الرئيس.

عبد الناصر: فكروا يعنى.. يعنى اقعدوا فكروا.

شكير: بنفكر فيها والله يافندم، يعنى أنا عايز نوزنها برضه يعنى بعد المؤتمر القومى العملية عايزين نشوف الإجراءات الللى تتخذ تبقى متلائمة مع ضخامة العملية الللى اتعملت، وبعدين انعكاسها إيه على الطلبة فى المستقبل، يعنى جايز ياخدوا دى علامة على استمرار ضعف! فبوزنها من كل النواحى.

داوود: هى تعبير بكلمة عزل الللى ورد فى القرارات فى الواقع تعبير واسع يعنى، بيشمل كل الإجراءات الللى هى بعزل هؤلاء عن مجموع الجماهير الللى هم بيأثروا فيهم؛ هذا العزل ببيجى بفصل، ببيجى بإبعاده سنة بتجنيده بحبسه باعتقاله.

سرى للغاية

شقىر: هى للقضاء فى أضيق دايرة يافندم بيدى ضمان إنه فىه مكونات جريمة معينة القانون واقف ضدها. واستنادا على كده، ده يمكن بيدى الفرصه للعملية التأديبية إنها تبقى مسنودة على عملية قانونية أو قضائية سليمة. إنما نوزن الموضوع من كل نواحيه ونشوف ردود الفعل المحتملة فى المدى القصير وفى المدى الطويل برضه.

عبد الناصر: أنا رأى إن الأساتذة أهم من الطلبة.

أبو النور: إحنا عندنا فىه جزء كبير معيدين حوالى ١٨ معيد.

شقىر: فىه ١٢ معيد دول على طول هينها عقودهم.

داوود: ممكن، هل الأفضل يعنى فصلهم ولا نقلهم؟

أبو النور: معيد؟ المعيد ده يروح.

داوود: أمثالهم كثيرين، يعنى مش هم دول بس يعنى فىه زيهم بالضبط فى وظائف غير مؤثرة فى الجماهير، هم بيتكلموا نفس الكلام بتاعهم بس دول اللى وسطهم أتاح لهم فرصة.

شقىر: نأخذهم على مرحلتين يا ضياء، فى اعتقادى يعنى لو الأول إنهاء عقد وبعدين يتصل بيهم شوية وبعدين..

السادات: ننقله يعنى بندى له مكافأة، ننقله من وظيفة لوظيفة وهو محرك يا ضياء!

شقىر: وقعدوا وحركوا وابتدوا مع الأولاد يعنى.

عبد الناصر: فىه تسعة منهم مقبوض عليهم.

سرى للغاية

شقىر: فىه ٩ مقبوض علىه من الـ ١٢ واحد دول إنما فىه ١٢ واحد فصل.. ده الاقتراح.

عبد الناصر: غير التسعة؟

شقىر: منهم التسعة.

عبد الناصر: اللى اسمه عصمت زىن الدين ده سابوه ولاّ لأ؟

شقىر: لا.. لا.. لأ.. عصمت ده مقبوض علىه.

عبد الناصر: كانوا قالوا إنهم أفرجوا عنه، وأنا شفت حتى ورقة إنه أفرجوا عنه بكفالة، وفيه معيدين أفرج عنهم بكفالة.

شقىر: فىه معيدين أفرج عنهم بكفالة، أصل عصمت فىه قضية ثانية حيساعل فيها.

عبد الناصر: لأ.. أنا أصل قلت عصمت بتخلوه مايسىيهوش بالذات لأنه تركه ده هيطلع يهيج الدنيا وهو راجل مجنون!

شقىر: هو راجل مهفوف.. وهو صغير ٤٨، ٤٩.

عبد الناصر: ونعيم؟

شقىر: لأ.. نعيم مش مشترك فى حاجة.

أبو النور: هو سلبى.

شقىر: موقفه سلبى من المجموعة بتاعة أحمد دوريش.

سرى للغاية

أبو النور: يعنى للأسف نعيم أخطر يوم الجمعة على أنه يخلى باله إن يحصل حاجة فى الكلية، وبعدين الدكتور شفيق الخشن كان جاى لى يوم السبت، وبعدين بيقول لى: ده نعيم أبو طالب جاى معايا فى القطر على هنا.. مصر، ساب إسكندرية كلها وجه مصر.

عبد الناصر: طيب يعنى يومين ثلاثة..

شقيير: بنقدر الموقف كله وبنعرض على سيادتك تانى.

داوود: هو كان فيه نقطة عاجلة بخصوص إحنا الحقيقة محتاجين إن احنا نحرك الاتحاد، كان فيه نقطتين يعنى محتاجينهم إنهم بيت فيهم برأى علشان ممكن يتحرك لأن اللجان نايمة خالص.

عبد الناصر: آه.. إيه؟

أبو النور: هو فيه بعض مواضيع علشان تحرك الاتحاد كنا قعدنا بحثناها، ومن ضمنها النقطة اللي سيادتك كنت أمرت بأن نفرغ الأمناء والأمناء المساعدين على مستوى المحافظات وعلى مستوى المراكز، وكان تكلمة ليها عملية إعطاء بعض التعويضات النقدية علشان يقدروا يقوموا بهذه العملية. فإحنا كنا بحثنا هذا الموضوع وقلنا عدة اقتراحات، فيه موضوعين..

موضوع بدل أعباء العمل اللي هو بيقوم بيه فى الاتحاد الاشتراكي؛ اللي هي نفقات استقبال أو الضيافة أو كلام من هذا القبيل، باعتبار إنه فى عملية جماهيرية وبتجيلة ناس. وكان الأمناء بتوع الاتحاد الاشتراكي فى السابق بياخدوا بدل تمثيل نائب وزير، وخفضت الى النصف فبقوا يأخذوا حوالى ٦٢ جنيه علاوة على مرتبه اللي هو كان بياخده.

إحنا كنا بنقول: نخفض الـ ٦٢ جنيه الى ٤٠ جنيه كوسيلة من الوسائل، يعنى إحنا قدامنا أمام هذه النقطة حاجتين: يإمأ بندى بدل نقدى بهذا الشكل يإمأ بنجعله يأخذ المصاريف الفعلية من المبالغ اللي موجودة عندهم؛ يعنى يدفع على حساب الاتحاد هذه المصاريف. وإحنا كنا بنفضل الحتة الأولى لأن دوکها هتبقى مفتوحة محدش عارف توصل الى فين، يعنى من ناحية دفع المصاريف الفعلية توصل ١٠٠ توصل كام محدش عارف! ويبقى فيها إمكانية كلام يعنى حد ينتقده.. والله ده أساء التصرف

سرى للغاية

فيها وكلام من هذا القبيل، فقلنا: من المستحسن أنه يأخذ ٤٠ جنيه والأمناء المساعدين ٢٠.

وبالنسبة للأمناء بتوع المراكز، مكانش قبل كده بيأخذ حاجة كان بيأخذوا ١٠ جنيه فقط ومكانش فيه للأمناء المساعدين خالص، وكان حتى ال ١٠ جنيه مش لكل الناس. إحنا اقترحنا إنهم بيأخذوا ٢٠ جنيه زى الأمين المساعد والأمين بتاع المركز والأمين المساعد بيأخذ ١٠ جنيه.. دول كبذل ضيافة فى هذه العملية.

بالنسبة للعناصر اللي هي مش موظفين حكومة، اقترحنا إنهم يأخذوا الدخل الفعلى اللي هو كان بيأخذه قبل التفرغ، يعنى إذا كان واحد فاتح صيدلية أو محامى ودخله مثلا ٦٠ جنيه أو ٧٠ جنيه بيأخذ ال ٦٠ جنيه أو ال ٧٠ جنيه اللي كانوا أصلا دخله طالما إنه حايقفل عمله ويتفرغ. قلنا: هيبقى على هذا الأساس بيأخذ دخله الفعلى بحد أقصى ١٠٠ جنيه، يمكن لو كان بيبقى له دخل أكثر من ١٠٠ مايبأخدش غير ١٠٠ فقط، وعلى هذا الأساس ببقى قدرنا نديله إمكانية إنه هو يتفرغ كليا لعمله ويبقى ماضرش نتيجة هذا التفرغ، نتيجة دخله وأيضا الأعباء الإضافية إنه حايترتب على هذا العمل السياسى قدرنا نديله تعويض معقول.. دول الآراء اللي احنا اقترحناها.

عبد الناصر: فيه تعليق يعنى؟

داوود: يادوبك يعنى.

عبد الناصر: خلاص.

أبو النور: موظفى الحكومة اللي هم هنجيبهم بالنسبة أيضا للتفرغ بتوع مقررى اللجان، كنت سيادتك قلت قبل كده، أمناء اللجان أو مقررى اللجان من موظفى الحكومة فى اللجنة، كنا اقترحنا إنهم يأخذوا بدل إضافة يعنى ٢٥٪ اللي بتأخذها موظفين الحكومة كبذل إضافى بحد أقصى ١٥ جنيه، على أن تصرف من الجهة اللي هو منتدب منها؛ لأن الاتحاد معندوش حاجة.

عبد الناصر: خدوا كام واحد يعنى؟

سرى للغاىة

أبو النور: لا.. ده عدد قليل يعنى بيبقى فى كل محافظة بين ٥ الى ٨.

عبد الناصر: آه.. مانتوسعش بس.

أبو النور: لأ.. هى متحددة ما بين ٥ أو ٨ على حسب حجم المحافظة.

عبد الناصر: غيره.

أبو النور: بالنسبة لنقطة أخرى، كان فيه اقتراح على أساس تقسيم جغرافى لنا على المحافظات لأن احنا واخدين تقسيم نوعى، وبعدين مفيش متابعة لعمل المحافظات فعليا وحركة مستمرة فيها؛ فكنا عايزين نقسم المحافظات تقسيم جغرافى علينا، بحيث إن كل واحد فينا يبقى مسئول عن كذا محافظة بيروح لها ويقعد معاها ويشوف مشاكلها ويتابع كل الأعمال بتاع كل اللجان فيها، ده بصرف النظر عن اتصاله المباشر باللجنة المختصة لكن ده علشان دفع العمل بصفة مستمرة.

عبد الناصر: آه.. معقول.

شقىر: بتدى دافع يافندم كسبيل أساسى.

أبو النور: ده طلب أبو زيد.

داوود: فى المؤتمر آه.

أبو النور: إذا كان سيادتك متفق على هذا الأساس يبقى بنقعد قعده وينقسمها على بعضينا.

عبد الناصر: طيب وابقوا دخلوا حسين.

أبو النور: آه.. طبعاً.

سرى للغاية

عبد الناصر: متهيألى الدكتور فوزى مالوش فى الشغلانة دى ولا؟

فوزى: لأ.. البركة فيهم! (ضحك)

أصوات: (ضحك)

عبد الناصر: يعنى بتدوله المنصورية ودهشور! (ضحك)

أبو النور: فيه نقطة ثانية فى قعادنا مع بتوع أمناء المحافظات والمراكز أثاروها، هم أثاروا من زمان وألحوا فى إثارتها دلوقتى بدرجة كبيرة جدا وفعلا مسببة نكتيفة لعمل الاتحاد الاشتراكى، اللي هى كنا بنقول: لابد أن يكون فى كل محافظة عربية للمحافظة وفى كل مركز عربية واحدة للمركز، إحنا حسبنا العملية دى كلها وجدنا إن المحافظات فيها ٢١ عربية، واللى ناقص ٢١٢ عربية لكل هذه العملية، وكلهم بيتكلموا كلام معقول جدا؛ بيقولوا: الدولة بتدى آلاف العربيات للجهاز التنفيذى علشان يقوم بعمله وفيه اللي عنده أكثر من احتياجه فى هذا الموضوع، الجهاز السياسى مهواش أقل من الجهاز التنفيذى احتياجا لهذه العربيات للتحرك أيضا زى الجهاز التنفيذى مايبأخذ.

عبد الناصر: آه.. نجيب منين العربيات؟

أبو النور: من الجهاز التنفيذى ٢١٢ عربية ننقيهم من كل القطاع العام والحكومة، ويروحوا بسواقهم وبنزينهم وكل حاجة الحتة اللي هو فيها يتلحق على المحافظة أو على المركز.

عبد الناصر: من المحافظة يعنى؟

أبو النور: من المحافظات، من نفس المحافظة من الأجهزة التنفيذية اللي فيها.

شقىر: أو من الوزارة المركزية يعنى مش ضرورى من المحافظة بالذات.

سرى للغاية

أبو النور: إذا كان سيادتك بتوافق على المبدأ بقعد مع أمين هويدى ونرتب الموضوع معاه.

عبد الناصر: موافق.

شقىر: هو فى لى وزارة النقل عدد من العربيات اللى كنا جمعناها من الوزارات علشان نبيعها للموظفين، هنشوفهم ويمكن نأخدم كلهم دول دول يمكن فى حوالى ٦٥ أو ٧٠ عربية.

أبو النور: أنا أصلى لما كنت فى الإدارة المحلية بحثت هذه النقطة، طلع منهم ١٠ سلام والباقى مش نافعين.

السادات: فى مرحلة من المراحل ياريس إنه الجيب الروسى نعممها على المراكز، ويبقى مفيهاش طمع وما حدش يتكلم عليها وتبقى عربية service.

داوود: وهو أيام السيد عبد المحسن ماكان فى قطاع الزراعة فى موسم المقاومة، وزع على كل مركز عربية كانت بتشتغل ويا لجنة المركز بصفة مستمرة طول مدة المقاومة ٣ شهور.

عبد الناصر: جابهم منين؟

داوود: من القطاع الزراعى.

السادات: الزراعة مليانة.

داوود: مع إنه ده الموسم اللى هم ببيقوا فيه محتاجين عربيات.

عبد الناصر: خلاص هو هيجيب العربيات.

سرى للغاية

أبو النور: فيه عملية الشباب، هي الشباب كمبادئ زى ما سيادتكم عارف إحنا مش عايزين نبت فيها دلوقتى، لأن إذا سيادتكم وافقت على المبادئ اللي موجوده هنا هنعمل اجتماعات لأمناء المحافظات ويدرسوا هذه المذكرة ويقولوا لنا رأيهم فيها قبل مانأخذ أى action فى الموضوع. هي جاية برضه من رأيهم هم، هو طلب منهم آرائهم كيفية سير منظمة الشباب فى الفترة اللي جاية بس عايزين نعرض عليهم النتيجة بتاع التجميع كله، بس جينا نأخذ رأى سيادتكم فى المبادئ اللي احنا ماشيين على أساسها علشان خاطر يبقى ماشيين فى الخط الصحيح. هو إحنا قلنا: إنه بالنسبة لمنظمة الشباب بالنسبة للعضوية، يتفتح باب العضوية للجميع اللي يحب يتقدم فى هذه المنظمة وأيضاً يفتح باب العضوية من جديد للأعضاء القدامى.

عبد الناصر: بما فيها الجامعات؟

أبو النور: لأ.. الجامعات بره، إحنا ساييين الجامعات بره الموضوع.

بفتح باب العضوية للقديم والجديد، القديم بيتقدم من أول وجديد ففى هذه الحالة بنقيم القديم والكويس بنقله واللى مش كويس مانقبلوش وبالنسبة للجديد بيتقدم كعضو منتسب. والقديم بيدخل كعضو عامل والجديد بيدخل كعضو منتسب لمدة سنة بيكلف بواجبات وبيدرب، وفى نهاية السنة اللي يثبت فاعليته ويثبت إنه كويس يضم كعضو عامل والباقي مايضمش.. ده من ناحية العضوية.

من ناحية القيادات الكوادر بتاعتها، قلنا: إن الاتحاد الاشتراكي فى كل محافظة مع أمانة التنظيم فى الاتحاد الاشتراكي بيقرروا الأمناء والأمناء المساعدين بتوع المحافظات كأول مرحلة، وبعدين الأمناء والأمناء المساعدين مع لجنة الاتحاد الاشتراكي بيقرروا اللجنة بتاعة منظمة الشباب فى المحافظة، بيتفقوا عليها وتوافق عليها لجنة الاتحاد الاشتراكي فى المحافظة، وتعرض على أمانة التنظيم فى الاتحاد الاشتراكي بتوافق عليها.

وبعدين اللجنة نفسها بتاعة منظمة الشباب فى المحافظة بتدرس الكوادر على مستوى المراكز الأمين وأمناء اللجنة بتاعة المركز، وتعرضها على لجنة الاتحاد الاشتراكي فى المحافظة بتأخذ موافقتها عليها؛ وبعدين بتيجى تعرض على لجنة شؤون التنظيم فى الاتحاد الاشتراكي بيتصدق عليها، وعلى هذا الأساس بيبقى بيننا الكوادر بتاع المنظمة.

سرى للغاية

نبيجى بعد هذا لعملية التدريب.

عبد الناصر: قبله بالنسبة لعملية التنظيم..

أبو النور: أيوه.

عبد الناصر: هو إنا الحقيقة المشكلة فى العملية الأولى، إن منظمة الشباب حسست إن ليها استقلال وليها كيان وإن ليهم لجنة مركزية لوحدهم! والحقيقة العملية بهذا الشكل هى اللى خلت التمرد هناك.. تمرد من المنظمة على الاتحاد الاشتراكى. وعلى هذا الأساس بتكون المحافظة الحقيقة هى المسؤولة عن كل العملية.

أبو النور: ما هو هنا اللى بقوله بقى: لجنة الاتحاد الاشتراكى هى القيادة المباشرة لمنظمة الاتحاد الاشتراكى فى المحافظة، وأى توجيهات وأى حركة تتم عن طريق لجنة الاتحاد الاشتراكى فى المحافظة - وليس من أمانة المنظمة - هنا الى الأمانات الفرعية فى المحافظات.

عبد الناصر: هو فى البلاد الشيوعية عاملين منظمة الشباب ليها لجنة؛ فيه بقى الحقيقة هناك نظام حزى حديدى - إنا مش موجود - يعنى اللى بيقول: بم تنقطع رقبتة!

شقىر: إنا موصلناش لهذا.

أبو النور: إنا قلنا: بالنسبة للكوارى دى محتاجه قطعاً لتدريب، فقلنا بفتح العضوية من أول يناير لمدة ٣ شهور لغاية أول إبريل، فى هذه الحالة بتكون العضوية، وفى هذه الفترة بتكون كونا الكوارى على مستوى المحافظات وعلى مستوى المراكز تشكيلاً. وبعدين بنبتدى من ١٥ يناير لغاية ١٥ إبريل بتدرب الكوارى على مستوى المحافظات وعلى مستوى المراكز، على إنا نأخذ نصف الكوارى على مستوى المحافظة بالإضافة لنصف الكوارى على مستوى المراكز ندرىها كدفعة أولى والباقى يشتغل يكون عملية تنظيم العضوية، وبعدين بيخلصوا دول ببيجوا يكملوا الشغل والنصف الثانى بيدرب.

سرى للغاية

عبد الناصر: إيه التدريب بقى؟ التدريب ممكن يكفرهم! (ضحك)

أبو النور: لأ.. إحنا حاطين أسس أيضا قلنا: بنشكل لجنة مشتركة من لجنة الشؤون الداخلية ولجنة الثقافة والإعلام عند الأخ ضياء، بيقدوا هم الاثنين وبيتفقوا على برنامج التدريب ومواضيع التدريب والمدربين وفين يتم هذا التدريب، دى نقطة أساسية فى هذا الموضوع. وبعدين قلنا: بالنسبة للتدريب، بياخذ حجم ثقافى عملى وحجم ثقافى نظرى وأيضا بنفرق بين الناس وبعضها؛ يعنى العمال مثلا بياخذ حجم ثقافى عملى بيختلف عن الحجم الثقافى بتاع الفلاحين؛ بالنسبة للناحية العملية الناحية النظرية واحدة.

مثلا بالنسبة للعمال بنديله إمكانية التحرك بدون أن يتصادم أو يكون عمله فى هذه الحالة متصادما أو مت دخلا مع أعمال الإدارة، وإزاي بيتحرك مثلا لمنع زيادة الإسراف أو لمنع الاستهلاك، وإزاي يقدر يدى آراء بالنسبة لتحسين الإنتاج الموجود عنده كناحية إيجابية فى هذا الموضوع، إزاي يتعامل مع الإدارة كعمل سياسى دون أن يتصادم مع الإدارة؛ بحيث إن أنا أشريه إنه هو ليس سلطة تنفيذية فوق السلطة التنفيذية اللى موجودة، وفى نفس الوقت له واجبات محددة بيتحط له بالضبط إنه يتحرك فيها مايتعداهاش، بحيث إنه هو لما يبجى يطلع ببقى يطلع فاهم واجبه الحقيقى اللى بيتحرك فيه، دون إن هو مايعتقدش إنه هو مفيش قدامه مجال للعمل بافتحله مجال للعمل يقدر يتحرك فيه، وفى نفس الوقت ببقى عارف حدوده بينه وبين الناحية التنفيذية فى العمل اللى هو يشتغل فيه.. ده جزء من ضمن الأجزاء اللى هو بيدرب فيها.

وفيه نقط إحنا كنا عاملينها بناء عن كلام سيادتكم فى الجماعة القيادية، فإكر سيادتكم زمان مبادئ أساسية للجماعات القيادية وكنا سبق طبعناها قبل كده وبنعيد النظر فيها تانى على ضوء الواقع الموجود هنا دلوقتى، وهنطلعها برضه كتعليمات تتحرك فيها كل المستويات سواء الشبابية أو سواء الاتحاد الاشتراكى على مستوى القاعدة؛ لأنهم هم فعلا لغاية النهارده مش عارفين إزاي يتحركوا.

عبد الناصر: هو الحقيقة الكلام اللى أنت بتقوله ده كله ببقى كلام زى قلته بالنسبة للتدريب؛ يعنى أنا اشتغلت أصلا فى هذه العمليات فى مجالات كثيرة:

أول عملية لازم الواحد يتعصب للحاجة اللى بيعملها.. ده الموضوع الأول.

سرى للغاية

أبو النور: لا.. أنا بقول من ناحية النظرى.

عبد الناصر: لأ.. الكلام النظرى والكلام اللى أخذوه قبل كده، أنا قرئت الكلام بتاع المعهد والكلام ده كله كلام يبيلب وبتشحن الناس فى أفكار!

تعالى اللى بياخدوه للإخوان المسلمين بيعملوا فيه إيه؟ الأول بياخدوه يقولوا له تعالى نصلى وبعدين يروح فى الجامع وبعدين يقعدوا بقى يجيبوا له آيات وكلام ويبقى متعصب جدا، وبعدين يحلفوه على المصحف وعلى المسدس، وبعدين تبص تلاقى الواحد من دول بقى تقريبا مسلوب الإرادة تناقشه ماتناقشه مفيش فايدة!

بيجوا الأولاد الشيوعيين تعالى بالنسبة للشيوعيين بيعملوا إيه؟ الصينيين بيجيبوا كتب ماوتسى تونج والكلام ده، هى كتب ماوتسى تونج فيها إيه؟ أنا قريتها كلها. لما تقرأ كتب ماوتسى تونج فيها الديمقراطية الجديدة، الحرب المؤجلة؛ عمليات اللى هى الآخر طلعوها فى الكتاب الأحمر واتكلموا على الشعارات.. بيقولوا علينا إحنا دولة شعارات! تمسك كتاب ماوتسى تونج الكتاب الأحمر كله شعارات! لما بنجى إحنا هنا نحشى الأولاد مخهم بكلام زى الكلام اللى كان فى المعهد الاشتراكى، وبعدين بنسيبهم مانربطهمش بيطلعوا ناس يصطادوهم! فالعملية أنا رأيت نمشى فيها مش بتوسع، وبعدين بهذا هيبقى التدريب تدريب بصحيح.

أولا: لازم ندى العقيدة، وبعدين بندى عقيدة مبسطة عندنا من الميثاق وعندنا من الخطب تلاقى فيه خطب مجلس الأمة ١٩٦٤ وكلام من ده، ممكن ندى بهذا ونخلى الأولاد يتعصبوا ويفهموا إيه يعنى المجتمع لأن ده هو اللى ضايع الحقيقة! بعد كده ندره على أنه يبقى حركى، لكن إذا مكنتش هتربطه بيك وهتدره هتدره وواحد هياخده يربطه بيه ياإخوان مسلمين ياشيوعى ودول موجودين فى البلد فى كل مكان؛ فالعملية الحقيقة هى أساسا عملية التعصب.

وبعدين فيه ناس مثلا من الشباب فاهمة إن الجدعنة إنه يقعد فى اللجان وينتقد ويتكلم، الحقيقة دول لازم ناس تتصدى لهم؛ مثلا اجتماعات الجيزة مين وقف واتكلم ومفيش حرية صحافة وكذا، وقف له السعدنى وقال له: إحنا مش عايزين حرية الصحافة إحنا عايزين.. أنا شوفت المناقشات اللى حصلت دى.

سرى للغاية

فالعلمية الحقيقة مش سهلة لأن الأولاد فى السنة دى ضاعوا وبعد انهيار منظمة الشباب ضاعوا أكثر! وبعدين منظمة الشباب كان فيها تيارات وعمليات بهذا الشكل، كيف تمنع العملية الجديدة من إنها تورث الأمراض القديمة؟

أبو النور: هو زى سيادتك ماقلت، هو الاتفاق ماشى أو المبدأ ماشى على هذا الأساس؛ إنها بتعمل منظمة مرتبطة عقيدة ومرتبطة ارتباط كامل بهذا النظام.

عبد الناصر: وبنقول لهم: إن فيه حزبين، الحزب الرجعى موجود فى البلد.

أبو النور: كلام متعلق بهذا النظام أساسا، وإن كنا إحنا بنبحث أى مواضيع داخليا بينا وبين بعض بنبحثه، لكن لابد إن احنا نقف أمام التيار الخارجى كتلة واحدة، هذا النظام بندايع عنه وندايع عن تصرفاته وندايع عن كيانه كأصحاب هذا النظام وكمتربطين بالنظام.

عبد الناصر: آه.. لكن اللى حصل فى المنظمة إن قالوا: إن احنا نضغط على النظام علشان ينفذ كذا! الكلام اللى حصل فى فبراير يعنى معرفش عندك تفاصيل عن العمليات دى؟ يعنى حصل اجتماعات وحصل إن ناس قالوا لازم نضغط ولازم نعمل! وده سببه الحقيقة إن المنظمة كانت تمثل كيان مستقل آخر غير الاتحاد الاشتراكى.

فهو إذا تلافينا الكيان المستقل إذا بنينا التعصب على أسس سليمة مش على كلام فارغ ولا إنشاء! واحنا كنا الحقيقة فى الأول مكانش فيه المنجزات دى كان سهل قوى بنعمل هذا الموضوع مع عملية تدريب ومايدخلش بين الأولاد إن احنا نقول لهم: إكتبوا تقارير على بعض أو العمليات اللى بهذا الشكل اللى بتخلى الناس تفقد الثقة من الناحية الأخلاقية. مفيش ما يمنع أبدا إن لو واحد انحرف بيبجى واحد بيقول إن فلان انحرف. لكن لا نكلفهم إحنا.

يعنى إحنا مثلا فى القوات المسلحة بيبجى ضابط بيقول: إن فلان كذا، إحنا ما بنقول لهوش هو الراجل بعقيدته بيبجى يقول. يعنى المؤامرة الكبيرة بتاعة المشير جم ناس اتكلموا، المخابرات مكانتش معنا جم ناس وقالوا، ناس لا نعرفهم ولا ليهم مصلحة ولا بنديهم فلوس ولا بنعملهم خدمات، ولكن لعقيدتهم جم اتكلموا وقالوا وبينوا العملية.. كيف نخلق هذا؟

سرى للغاية

أبو النور: هو الطريقة اللى احنا عايزين نعمل التدريب على أساسها، وهى تتوقف أيضا على اختيار العناصر اللى حاتدرب. هى دى النقطة الأساسية فى الموضوع، بحيث إن احنا نخرج عن الدائرة القديمة اللى هى عاملة المشاكل دى كلها.. الدائرة القديمة مثلا أنا قعدت مرة فى نقاش مع إبراهيم سعد الدين فى الأمانة هنا؛ بيناقش مع الطلبة فى المعهد الاشتراكى، هل هذا النظام قادر على إنه يتحمل المسئولية فى هذه الفترة ولا لأ؟ طب إذا كنت أنا كمعهد باشكك هل هذا النظام قادر وحطيتها موضوع للبحث ببقى مفتوحة لأى واحد يقدر يقول أى حاجة!

عبد الناصر: لأ.. الحقيقة هو إبراهيم سعد الدين هو متقلب وهو انتهازى كبير فى رأى، وهو كان عايز يوصل يعنى هو كان عايز ببقى وزير، دى العملية اللى فى راسه! وبعدين هو النهارده لما طلع من الأمانة، هو النهارده كلامه سم فى كل المجالات.

شقىر: النمو الاقتصادى والكلام ده.

عبد الناصر: لأ.. بيتكلم طبعا بيعتبر إن فيه مسئولين عن إسقاطه، وبعدين إبراهيم سعد الدين لما كان راح موسكو كان مستنيه مازاروف.. واحد من المكتب السياسى. ماهو معتبرين إن الأمانة العامة.. وبعدين عندك فيه مجموعة إبراهيم سعد الدين ولطفى الخولى وواحد فى الأهرام اسمه ميشيل معرفش ميشيل إيه؟

استينو: ميشيل جريس.

شقىر: وسلامة أحمد سلامة من نفس المجموعة فى الأهرام برضه.

عبد الناصر: لأ.. دول مجموعة خالد وخيال.

شقىر: سعيد خيال آه.

سرى للغاية

عبد الناصر: مجموعة الحقيقة بتجتمع أسبوعيا مع خالد محى الدين وبيتفقوا وبيتفاهموا مع بعض، ممكن ببيجى معاهم ساعات فؤاد مرسى وإسماعيل صبرى. لكن المجموعة دى بالذات إبراهيم سعد الدين ولطفى الخولى وميشيل ده أساسا بيشتغلوا مع خالد وليهم اتجاهات طبعا بيشتغلوا شيوعية.

شقىر: يافندم بالنسبة لعملية الشباب، الحقيقة إحنا درسنا الإيجابيات والسلبيات وكل المقترحات دى وضعت لعلاج السلبيات اللى كانت موجودة. يعنى إحنا لقينا السلبيات.. العضوية كانت مقولة فوضع هذا التنظيم بتاع العضوية، بصينا لقينا أيضا من أسباب السلبيات اللى خلقت tension كبير جدا استقلالهم عن منظمات الاتحاد الاشتراكى خصوصا على مستوى المحافظة، فوضع هذا التنظيم. ولما درسنا التدريب، كانوا بيشتحنوا الأولاد شحنة نظرية عامة، وبعدين زى ماقلت سيادتك لا بيمهد لها التعصب ولا بيستمر بعد إعطائهم الشحنة دى بالربط؛ فبتكون النتيجة إن الولد بيطلع مليون بأفكار غامضة وكثيرة الحقيقة، بيروحوا لاقطينه. وإحنا حطينا مقترحات للأسس اللى هيمشى عليها البرنامج التدريبى، وهو الأخ ضياء وأنا بنأمل ولو بعد العيد بنقدم لسيادتك من الخطب ومن الميثاق تحليل عمله ككتيب مختصر يبقى أساسى للتدريب كخطوط بنمشى عليها.

أبو النور: لازم يتحط المواضيع بالتفصيل علشان محدش يخرج عنها.

داوود: هو الفكرة إن الفترة اللى فانت دى كلها المعهد هو اللى استقل بوضع أسس التقيف كلها على جميع المستويات، يعنى حتى معظم المحاضرات بتاعة منظمة الشباب اللى واضعينا بتوع المعهد، المحاضرات اللى كانت فى كثير من المعاهد الإقليمية كان أساسها برضه جاي من المعهد. فالنهارده لابد إن احنا نوجد كادر جهاز معين وظيفته إنه هو يستطيع يآلف، بيراجع ويحلل الخطب ويجيب الميثاق ويربط ويدينا برنامج، صحيح بتديله المواضيع إن مهمة التأليف وإيجاد المحاضرة المترابطة والموضوع كله على بعضه زى اللى كان بيحصل؛ عايزين له جهاز.

الحقيقة الواحد النهارده مش عارف يعنى مجموعة المعهد طبعا تشتتت، وهل نستطيع نستعين بحد فيهم ولا؟ هل فيه بديل نجيبهم مايقاش أيضا له خلفيه معينة؟ ومن هم البديل؟

سرى للغاية

عبد الناصر: ما نجيب أبو زيد ما هو عنده مؤلفات وعمل إعلان عنها! (ضحك)

أصوات: (ضحك)

داوود: يعنى عملية الدراسات القومية اللي فى الجامعة ما هي دي أيضا مشكلة، وأنا رأيى إن اللي قريرته النهارده فى الجرايد: إن الجامعه بتستقل بوضع هذه العملية هنعود مرة ثانية الى الخطأ؛ العملية دي سياسية بالدرجة الأولى، ومفيش حزب فى العالم خصوصا الأحزاب التقدمية بتترك عملية الدراسات القومية علشان توضع بالأساليب الأكاديمية البحتة، لا بد أن هي وضع سياسى ولا بد أن..

عبد الناصر: بس هي وضعت معرفش إزاي؟!

شقيير: والله يافندم أنا لما رحى التعليم العالى لقيت وضع المواد القومية وضع مؤسف جدا! فأنا عملت لهم مؤتمر لمدة شهر وحشدت معاهم عناصر من الاتحاد الاشتراكى بعضهم كان أساتذة وبعضهم غير أساتذة وقسمناهم ثلاث مجموعات، وفى الآخر الحقيقة يمكن أكاد أكون وضعت عناصر المنهاج بنفسى. وأنا هجيب لسيادتكم صورة من الموضوعات اللي قلنا: إن كل منهج يشتمل سواء فى المجتمع العربى أو ثورة ٢٣ يوليو أو الاشتراكية الموضوعات ك headings للموضوعات سليمة وكويسة فى اعتقادى، هي النقطة بقى اللي بيدرس.. يعنى دي هي النقطة الحقيقية.

داوود: اللي فى الجامعة مشى على الأسلوب المدرسى، حاطين رأس الموضوع ويعدين الأستاذ بيشرح فيه زى ماهو عايز ويحلل زى ماهو عايز، وليه حرية البحث اللي فى الجامعة! فى العلوم السياسية بالذات أو العلوم القومية مايمكنش تترك بهذا الشكل، بنحط text بنحط فيه كل الرؤوس بحيث إنه يبقى فى إطار معين مايتجاوزش. صحيح بيقول إنما فى حدود هذا الإطار مانسيبلوش بقى يخش فى تحليلات بحيث إن كل واحد بيبقى خارج بفكرة مختلفة عن التانى، ويعدين كل واحد له خلفية معينة بيؤثر وبيلون الكلام اللي هو بيقوله حسب العملية.. العملية محتاجة صحيح ماينعملش كتاب مدرسى..

سرى للغاية

شقىر: لا.. لازم والله.

داوود: إنما على الأقل فى كتاب بىحدد الخط.

عبد الناصر: هو نقرر نحدد، الحقيقة فى عدد من أساتذة الجامعة كويسين، بنقرر يعنى من هؤلاء الناس بنشغلهم يعنى.

شقىر: للتتقىف، وفى المواد القومية.

عبد الناصر: لأ.. فى الكتابة ومادة الموضوعات، وبعدين الحقيقة طبعاً الجامعة فى اليمينيين وفى اليساريين؛ مش عايزين نفع هنا ولا نفع هنا عايزين نمشى فى الخط بتاعنا.. يعنى مثلاً فى الاتحاد السوفيتى بيدرسوا وحتى إحنا طلبنا تلامذتنا مايدرسولهمش.

شقىر: مش راضيين يافندم.

عبد الناصر: لأ.. كان وافقوا فترة، إنما راجعين دلوقتى تانى.

شقىر: بيرجعوا فىها.

عبد الناصر: ممكن الحقيقة الناس دول..

شقىر: هو أنا كنت اتفقت معاهم يافندم السنة اللى فاتت إن بنمر بمرحلتين..

المرحلة الأولى: كان فى عدد ضخم من الكتب بمناهج مختلفة فيما بينها، فقلت كمرحلة أولى وده كان فى العام الماضى بينكتب كتب على أساس المنهج الجديد اللى وضعناه واتفقتنا عليه، وكان الاتفاق على أساس إن من السنة دى بيدأ كتاب موحد بتوضعه مجموعة منهم يشرف عليه وكيل الجامعة المختص، وأنا كان فى ذهنى من خلال وكيل الجامعة أمسك معاه العملية بشكل عام. ففكرة الكتاب الموحد وافقوا عليها وخالصة، هذا الكتاب الموحد بنستطيع نطبق نفس الفكرة وبنأخذ مع مجموعة منهم يكتبوا ويندهولهم، وبيبقوا هم اللى كاتبينه وهم اللى عاملينه.. الى آخره بس إحنا نراجعهم ونشوفه.

سرى للغاية

داوود: هو الحقيقة فيه كمان نقطة أنا أصلى قريت كثير من اللى عملوه فى المعهد، يعنى هو فيه حاجات كويسة يعنى فيه محاضرات كويسة جدا وعلى الخط المضبوط جدا وفيه شطحات، إنما تحتاج الى غربة يعنى ماتحتاجش إن احنا نرميها ١٠٠٪ تحتاج إن احنا نغربل وحنأخذ منها حاجات كويسة جدا.

وبعدين الحقيقة بالنسبة لإبراهيم وغيره، أنا لى وجهة نظر صغيرة أحب أقولها: هل من المصلحة إن احنا نرمى الناس دى؟ صحيح هم لهم دور فى فترة من الفترات، وبعدين واحد زى إبراهيم أنا أعتقد إنه رغم العيوب اللى فيه إنما عقلية كويسة عقلية قديرة، يعنى يمكن مش سهل تعويضها كقيادة لعمل بهذا الشكل، فهل من الأفضل إن احنا نتركه للنسيان؟ وبعدين بيتدى يشط وقد يكون لشططه فيه نوع من الخطر أو يعنى باعتباره إنه هو بهذا التفكير أو بهذا، ولاّ ممكن إن احنا نستفيد منه فى زاوية متأثرش برضه على الجماهير أو معرفش الحقيقة..

عبد الناصر: هى وجهة نظر سليمة الحقيقة، ما هو ياهنلمه يانعتقله! (ضحك) هو الموضوع الحقيقة بهذا الشكل، ليه؟ ما هو إذا ملمتوش هيمشى فى السكة اللى هو ماشى فيها بدائيا حتى يصل الى ما يمكن أن يصل إليه واحد يائس يعنى. وأنا فى موضوع اللم بقول: هو إبراهيم سعد الدين ما بيعملش تنظيم، وأنا برضه باقسم الناس الى عدة أقسام.. الشخص اللى ما بيعملش تنظيم مهما كان تفكيره ماركسى أو كذا وكذا حتى أو إخوانى مالوش ضرر؛ الضرر الحقيقة من الشخص اللى بيعمل تنظيم. فهو إبراهيم سعد الدين حاول باستمرار إنه يبين إنه ماشى وإنه كويس، وهو حصل تحقيق معاه فى فترة من الفترات. هو النهارده اللى بيعمله عملية رد فعل إسقاطه فى الشرقية، هو طبعا عارف إنه إنقالهم: إنه ماترطوش إبراهيم سعد الدين بعلى صبرى مفيش علاقة بينهم ونتج عن هذا إنه سقط، يعلم هذا كلية يعنى.

وبقية المتشيعيين أيضا بهذا الشكل يعنى بيجروا على بعض ويتاع، على أساس إنهم كان عندهم أمل إنهم يدخلوا فى داخل الاتحاد الاشتراكى، ثم يقدروا يبقى لهم وضع! هم الحقيقة بيفكروا فى الناحية الذاتية يمكن أكثر مما يفكروا فى الناحية الشيوعية، كل واحد سقط عارف يا عبد المجيد فريد سقطه يافلان سقطه بهذا الشكل.

سرى للغاية

فأنا فى رأى أنا معاك، إذا أمكن اللم كويس مع الحذر، يعنى الحقيقة ده سبيل
يجب إن احنا نتبعه بالنسبة لكل الناس أى واحد نقدر نلمه يجب إن احنا نلمه بدل ما
نحبسه.

السادات: مادام مايعملش تنظيم مايقاش خطر.

شقىر: هو كان عندى قريب قوى، فبيقول لى أنا قاعد باقبض مرتب بلا عمل! وباروح كل يوم
المكتب وبأخرج مفيش أى حاجة.. مبادئ أى شئ للدولة الآن! وبعدين هو برضه فى
دماغه فكرة إنه سقطوه، إنما هو فى دماغه فكرة أكثر إنه بيقال عنه: إنه كان بيحارب
السيد على صبرى أو بيتحزب أو بيبكون مجموعة ضده، وبيبرأ نفسه بيقول: أبدا أنا
معملتش حاجة زى كده وليه يساء بى الظن؟! وأنا راجل ملتزم ومستعد أمشى فى الخط!
متهيألى يمكن بإشارة صغيره معرفش ده فى تقديرى يمكن أنا مش متعمق قوى يعنى.

عبد الناصر: لأ.. هو شوف هو اللى أعرفه عنه إبراهيم سعد الدين ولطفى الخولى ومشيل بتاع
الأهرام وخالد محى الدين، دى مجموعة بتتقابل كل كام يوم مع بعض وبيسهروا مع
بعض ويقعدوا مع بعض وبيتكلموا مع بعض وبيعملوا أبحاث مع بعض وعملية بهذا
الشكل.. ده موضوع.

طبعا هم ماركسيين شيوعيين، ويمكن فى كلامهم الخاص بيعتبروا إن احنا
موصلناش لدرجة كبيرة من الاشتراكية، وقد يكون هذا صحيح! خالد بيعمل عملية هو
هو مالوش تنظيم، خالد يخدم الناس عند الوزارات وهو أشطر من كل واحد هنا فى
العمليات دى؛ بيمشى للناس مصالح كثيرة، ويلف على الوزارات واللى ليه طلبات وعمليات
بهذا الشكل، وبهذا يعنى يبقى ليه رابطة بالناس. إنما عملية تنظيم مفيش تنظيم، هو
العملية ممكن يبقى فيه تلسين أو عدم تلسين، وبعدين إذا حبيت تاخده معاك أنا
معنديش مانع.

شقىر: لأ.. هو مانديلوش عمل تثقيفى يافندم.

أبو النور: عملية تثقيفية أبدا!

سرى للغاية

شقىر: يعنى هو نحدد له عمل يشعره إنه هو بيساهم معنا فى حاجة دون أن نعطيه فرصه للتأثير على الجماهير، وده بعنقد إنه ممكن لو قلنا مثلا لإبراهيم سعد الدين بيلخص لنا بشكل مستمر مجالات الفكر اللى جاية من العالم الشرقى.

عبد الناصر: لأ.. أو بيعمل محاضرات وتراجعها.

داوود: مانحطش إسمه فيها خالص.

عبد الناصر: لا.. لأ.. اللى هو قصدى المحاضرات.

شقىر: مكتوبة وبنحاول إحنا نصلح فيها.

عبد الناصر: هو إحنا عندنا من الفكر الماركسى ٨٠٪، يعنى إحنا واخدين من الفكر الماركسى يمكن ٨٠٪ أو أكثر. أما اليمىنى حاتبص تلاقية مختلف معاك ٨٠٪، الشيوعى مختلف معاك ٢٠٪ يعنى ده تقديرى فى العملية. مانقدرش إن احنا نقول مش واخدين من الفكر الماركسى، يعنى لما بنقرأ الميثاق وكده واخدين.

العملية ماجيبش إبراهيم سعد الدين وأخليه يجيب staff ويجيب الشيوعيين، وبعدين بيقى عنده معهد ويختاروا طلبة ويجيبوا طلبة شيوعيين وبيربطوا! لأ.. هو العملية مثلا إنه بيحبيه معاه وياخده فى الأمانة بيوجهه الى عمليات بهذا الشكل تحت مسئوليته بحيث إنه مايفلتش.

شقىر: ومايتصلش بالجمهور.

أبو النور: وهو مطرحه نكلفه بكتابة أشياء.

داوود: الواحد عايز يقول حاجة: هو لغاية دلوقتى إحنا ماخلقناش كوادر نقدر نقول: إن لها فكرها الذاتى المستقل، الكوادر النشطة الموجودة النهارده هى فلول الشيوعيين، هم دول الموجودين وهم دول اللى عندهم قدرة التنظيم وقدرة التفكير المنظم.

سرى للغاية

عبد الناصر: لأ.. تنظيم مابقاش عندهم.. كناس يعنى.

داوود: لأ.. هم كانوا بيستطيعوا إنهم يلتقطوا كل الناس النشطين؛ وإحنا بندوخ على ماندور على واحد أمين فى لجنة بيكون هو مكون عشرة فى حته! يعنى بيعرف إزاي يلتقطهم عملية غريبة!

عبد الناصر: هو أنا رأيى بالنسبة ليهم لمهم أسلم، ورأىي: إن إبراهيم سعد الدين هو انتهازى وله تطلعات وإذا حس بأى إشارة زى أنت ما بتقول بيمشى. بعدين هم مفيش تنظيم بينهم، ولكن هم اتلموا أيام عملية خالد علشان مساعدة خالد للنجاح، وخالد اتصل بيهم جميعا لدرجة حتى إنه اتصل بسعد التايه! سعد التايه ساكن قدامك؟

أبو النور: لأ.. ده كان فى الإدارة المحلية جنبى جنب الوزارة.

عبد الناصر: أه.. إتصل بيهم كلهم وكلهم اشتغلوا مع بعض، وبعدين بقى طلع إن مثلا لطفى الخولى طبعا زعلان إنه سقط، إبراهيم سعد الدين زعلان إنه سقط، فؤاد مرسى.. الحقيقة إن أنا رأيى لمهم أحسن من تركهم؛ لأن إذا مالماناهومش بيبقى حنوصل الآخر الى حبسهم ومفيش داعى لهذا. وهم مستعدين يعنى بالذات فؤاد مرسى مستعد إسماعيل صبرى مستعد، إبراهيم سعد الدين أيضا مستعد، أو أبو سيف أيضا معرفش بتعرفه ولا لأ؟ وهو أبو سيف ده كان سكرتير الحزب.

داوود: ولا أعرف فؤاد مرسى.

شقير: لأ.. فؤاد مرسى كان أستاذ فى إسكندرية دلوقتى فى شركة السيارات.

عبد الناصر: ولا المباحث كانت عارفاه! أنا جالى خالد محى الدين يوم ومشى من عندى، قمت مسكت مجموعة المساء جبتها وقلت من هو؟ كان أيامها سكرتير الحزب الشيوعى بلغت عنه زكريا، كان هو أستاذ فى جامعة إسكندرية اندب خالد محى الدين؛ خالد محى الدين مدب كبير قوى يعنى مكانوش عارفينه كانوا فاهمين إن إسماعيل صبرى هو سكرتير الحزب، بعد كده فؤاد مرسى ساب وسيف أبو سيف هو اللى مسك.

سرى للغاية

وبعدين هو سيف أبو سيف كان ماشى الحقيقة كويس جدا جدا أيام عملية خالد كده، هو بيشتغل فى الأهرام وأنا الحقيقة اللي مشغله فى الأهرام، وفؤاد مرسى رئيس مجلس إدارة شركة، وإسماعيل صبرى مستشار فى دار المعارف؛ يعنى الحقيقة كلهم عملية التشغيل دى برضه فتح العملية ليهم عملية كويسة ولمهم كويس.

وبعدين هم مايعملوش تنظيمات - يعنى اللي بيعملوا تنظيمات مجموعة أخرى - ومفيدة جدا؛ يعنى فى الناحية الاقتصادية أيضا وأى بحث ممكن بتديه لهم يشتغلوا فيه، وأيضا فى ناحية اللم والثقافة. هو عيبه بقى انعكاس العملية دى بره أول ماتجيبهم الناس بيقولوا الاتحاد الاشتراكي بقى شيوعى!

شقيير: آه.. هو ده رأيى أنا، ولذلك ماياخدش شكل عام مايجوش فى مكتب نشغلهم بالحنة من بره مش هنديهم حاجة نمسكهم عمل يعنى.

أبو النور: هو كان فيه نقطة صغيرة عايز أقولها لسيادتك فيما يختص بموضوع ربط الناس: إحنا عايزين نتحرك كاتحاد اشتراكي على أساس ربط حزبي زى ماسيادتك ماقلت. الربط الحزبي أيضا فيه ربط مصلحي من الناحية العادلة لمصالح الناس القياديين اللي بيشتغلوا معانا؛ لأن دى نقطة أساسية مفيش حد بيقبل يشتغل من الناحية الوطنية ومبدأية بس، وإنه هو بيبقى شاعر إنه مغبون فى شئ ومضروب من حنة وكلام من هذا القبيل ومنساعدوش مش ممكن يعنى! وعايزين نهتم بهذه النقطة كمبدأ أساسى للانطلاق بتاع الاتحاد الاشتراكي.

ودى بتدخلنى برضه لنقطة من ناحية الجماعة اللي كانوا معانا فى الاتحاد الاشتراكي قبل إعادة التنظيم، كان عندنا ناس أمناء فى الاتحاد الاشتراكي وقفلنا محلاتهم لما تفرغوا، يعنى اللي كان محامى قفلنا مكتبه وقعد ٣ سنين قافل مكتبه وبعدين جه ساب وسقط فى الانتخابات الأخيرة، يعنى أصبح النهارده عاطل ومش لاقى ياكل؛ طب النهارده ده مثل سئ للناس بتوعنا إن احنا شغناه معانا بقاله ٣ سنين وقفلنا له مكتبه وقفلنا له اتفرغ، وبعدين لما جه سقط سنتان فى الهوا! على الأقل الجديد اللي جاى باصص كده ويقول أنا بكره يحصلي هذا الكلام، وهم كلهم عدد محدود للغاية.

عبد الناصر: كام يعنى؟

سرى للغاية

أبو النور: أنا اعتقادی بتوع ٣٠ واحد.

داوود: مايجوش، أقل.. بييجى ٢٢ حاجة زى كده.

عبد الناصر: نشغلهم فى الاتحاد الاشتراكى، هو الحاجات دى لازم تثيروها الحقيقة لأن أنا معرفش يعنى الموضوع دا نقط مهمة الواحد مش عارفها.

شقىر: حاجات صغيرة وتعمل مشاكل كبيرة يافندم.

عبد الناصر: وأنا بالذات.. هو كل حاجة ممكنة يعنى مفيش حاجة مش ممكنة، وبعدين هو إنتو برضه لما تروحوا المحافظات وتروحوا زيارات تشوفوا المواضيع لازم تبتوا فيها، وبعدين ممكن تطلبنى فى التليفون إذا كنت متردد وأنا قاعد يعنى معنديش شغل أطلبنى بالتليفون، زى ما كنت باطلبكم فى المنصورة وممكن بارد عليك وأقول لك كذا؛ وإلا الحقيقة بتبقى الزيارات.. تفتكر أيام كمال حسين ماكان ماسك الإدارة المحلية، كنت بقول له: بيطلع ويبيت ويعمل اجتماعات ويبيت ويجيب لى قرارات جمهورية وبمشيها له والدنيا كانت ماشية الحقيقة، وإلا العملية بتبقى كلها منظر! ولازال الاتحاد الاشتراكى لغاية دقولتى كله منظر يعنى ولسه ماتفتحش.. يعنى الأويرج بيشتغل أحسن! (ضحك)

أصوات: (ضحك)

أبو النور: هو فيه نقطة يافندم إحنا بنجيبهم هنا كتير يعنى فى اجتماعات كثيرة، يعنى لسوء الحظ بعد الانتخابات حصل مؤتمرات كثيرة هنا والمؤتمر القومى وبعدين اللجان المركزية كل ١٥ يوم، فيبقى فترات بعيدة عن مكانهم. أنا فى رأى إنه مايجيش غير اللجنة المركزية واجتماع مرة فى الشهر يعنى أكثر مفيش من كده وإحنا ننزل.

عبد الناصر: هو تعمل لهم اجتماع أما بييجى اللجنة المركزية، إحنا عندنا بعد بكره اجتماع اللجنة المركزية علشان موضوع الانتخابات، عملتوا إيه؟

سرى للغاية

السادات: لسه الأمناء حاجونا بكره إن شاء الله ياريس لكن يعنى مش هيجيبوا جديد، وكل اللى قالوه فى المذكرة موجود.. مفيش حاجة جديدة يعنى.

عبد الناصر: طب إحنا هنرسى على إيه؟

السادات: أنا مش حاطط هنا رأى الحقيقة ياريس على أساس يعنى..

شقىر: إحنا ياريس بعتمد إن أسلم حل يجنبنا إن نقسم وحدات الاتحاد الاشتراكى على بعضها، وإن سيادتكم تاخذ مسئولية استبعاد حد ويجنبنا كل ده وإن يتقدم لنا ٣٦٠ حزب، إن مؤتمر كل مركز يجتمع وبينتخب مرتين أو ٣ مرات ترشيحات، ومش ضرورى يكون اللى هيتقدموا للانتخابات من أعضاء المؤتمر يعنى نفتحها بحيث يتقدم أى عضو فى الاتحاد الاشتراكى؛ سواء كان عضو لجنة أو عضو مؤتمر أو عضو عادى فى الاتحاد الاشتراكى، وبعدين غير دول مانسمحش يافندم بإنه يتقدم. بالصورة دى بيقوا هم اللى عملوا بنفسهم عملية الفرز من الأول، حانقدر نشغل ونأثر برضه على مؤتمرات المراكز على نحو أو آخر، وبالشكل ده بتطلع العملية سهلة.

الشافعى: بس إذا كان المؤتمر هو اللى هايحدد، حاتجد إن المؤتمر هو برضه صاحب المصلحة المباشرة فى الموضوع، يعنى إذا كان على مستوى المركز عددهم محدود، فطبعاً هيعملوا كل الإجراءات على أساس إنها تبقى قاصرة فى مجالهم يعنى، كإن عملية إدخال الوحدات كلام بس، هيبقى يعنى..

أبو النور: هو اتنين من كل وحدة أساسية فى المؤتمر يبقى ٦٠.

الشافعى: لا.. لا فيه ١٤٠.

أبو النور: لا.. معلىش نأخذ على المتوسط.

الشافعى: لا.. بس هو الاعتراض على النقطة الوحيدة إن المؤتمر هو اللى يقوم بالتنسيق فيه بالنسبة للطلبات، لأ.. لازم يعنى جهه غير المؤتمر، يبقى أكبر من المؤتمر إذا كنت عاوز تنسق أو تسيبها بقى على طول.

سرى للغاية

أبو النور: لأ.. هو مايبختارش اتنين يعنى مايبختارش نهائى بيختار ياضعف العدد ياتلاث أمثاله على حسب ظروف الوضع اللى هم فيه والناس المتقدمين. وفى هذه الحالة بيتترك للجماهير بقى تختار من ضمن دول.. العدد المطلوب اللى هو واحد وواحد، يعنى هو كل العملية إنه بيجعل الموضوع بدل ما هو مفتوح لأى عدد يدخل ويبقى فيه صراعات وتدخل عناصر..

الشافعى: هو إذا ارتضوا إنهم فى داخل المؤتمر يعملوا انتخابات مبدئية زى انتخابات الأمين.

السادات: ماهو دى رأى القاهرة، بس ده ينطعن فيه بقى.. يعنى بيقلوا جبتوا لنا مرشح..

أبو النور: لأ.. هو بيبجى إزاي؟ يعنى يصح جدا إنها بتيجى إفرض سيادتك إنه متقدمين ١٠ يافلان اتنازل علشان فلان مش ضرورى يعنى تتاخذ تصويت وانتخاب وكلام من هذا القبيل إلا فى المرحلة الميئوس منها لكن بيحاولوا يوفقوا بينهم وبين بعض لغاية مايوصلوا مثلا ستة من العشرة، يبقى خلاص وأى واحد منهم ينجح زى بعضه.

عبد الناصر: بنسمع رأى عبد المجيد.. إيه رأيك؟

فريد: النهارده كان عندنا مؤتمر للقاهرة كان نتيجة مؤتمرات إمبراح، هم حطوا ٣ أسس، وكان فيه إتجاه إنه مفيش داعى لانتخابات مجلس أمة فى الوقت الحاضر.

السادات: دى طالبين أبلغها لك رسمى ياريس كل الأمناء ككلام فى القاعدة كلها، إن بيشوفوا إنه مفيش داعى لمجلس الأمة.

الشافعى: وده موجود فى البلد برضه الإحساس ده.

السادات: آه.. إحساس عام، قالوا تبلغه للرئيس وكفونى أبلغهولك رسمى.

الشافعى: لدرجة إنهم بيربطوها بـ ٣٠ مارس.

سرى للغاية

عبد الناصر: ما هو إذا كان ده إحساس عام مانعمل اتنين فى كل دايرة ونخلص! (ضحك)

أصوات: (ضحك)

عبد الناصر: ما هو بقى مفيش انتخابات هيقلولوا رأيهم آه ولا لا؟!؟

السادات: لا.. هو بالذات لا عاوزين مجلس أمة ولا انتخابات بالذات فى المرحلة دى.

عبد الناصر: إحنا إذا معملناش انتخابات بحكم الدستور، بييجى بيقد لى بعد ٦٠ يوم المجلس القديم ولا إيه؟

السادات: دستوريا لأ.. هو اتحل خلاص، وإنت أصدرت قرار الحل ياريس خلاص.

عبد الناصر: لكن إذا ماجاش الجديد؟

السادات: آه.. يبقى اجتهادات بقى.

الشافعى: مانستناش من غير مجلس.

داوود: لا.. هو ده رأى عام مغرض برضه يعنى بيعبأ بغرض؛ لأنه هو نفس هذا الرأى العام هو اللى كان بيشتم فى مجلس الأمة دوكمه هو اللى بيعيط علشانه النهارده وهو اللى بيقول: ماتعملوش انتخابات، وهو اللى هيقل بكرة البلد بتحكم بحكم غير ديمقراطى!

عبد الناصر: بنسمع رأى عبد المجيد.

فريد: وبعدين الحاجة الثانية اللى موافقة عليها كل الأقسام كاتجاه، وهو لابد أن يكون للاتحاد الاشتراكى دور لأن الحل التبادلى لابد إن الاتحاد الاشتراكى يعلن قرار.

سرى للغاية

السادات: ده كلام الأمانة برضه ياريس.

فريد: ببيجى بالنسبة للدور..

عبد الناصر: إيه هو بقى؟

فريد: الدور إن على مستوى الدائرة أو القسم، إذا كانت الدائرة قسمن فأعلى سلطة سياسية وهى المؤتمر، عايزين يوسعوا شوية المؤتمر بإضافة الأمانة والأمانة المساعدين بتاعة كافة الوحدات، والبعض بيتوسع شوية إن تيجى لجان العشرات للمناطق السكنية؛ بمعنى إن المؤتمر يبقى أوسع بدل مايبقى محدود علشان مابتتحكمش فى مناقشته وتزكيته للأعضاء على أن يترك الترشيح للآخرين. يعنى لا نحجب أى ترشيح، فى نفس الوقت المؤتمر بعد كده يدير المناقشة على تزكية العدد المطلوب للدائرة؛ لأنه لو حطينا أكبر هنفقت أصوات الاتحاد الاشتراكي بينما الآخرين المرشحين ممكن إنهم يجمعوا نفسهم على شخص معين.

عبد الناصر: يبقى معنى هذا إنه يبقى عندك جوه البرلمان اتحاد اشتراكي، ومن خارجه..

أبو النور: هو الاحتمال إنه يبقى عدد ضعيف طبعا.

عبد الناصر: ببيقى يعنى إنه بيحصل معارضة منظمة وهو حزب غير منظم!

شقيير: هو الرأى ده لو سمحت لى يافندم إنه قد يؤخذ عليه إنه عبارة عن انتخابات على مرحلتين درجتين، يعنى كأنى باعمل العملية على مرحلة أولى وخلص ودول بعد كده بيطلعوا، إنما الفكرة الثانية هى عملية تزكية للترشيح.

عبد الناصر: لأ.. هو هنا بيقول بافتح الباب لكل مايقاش على مرحلتين، الاتحاد الاشتراكي بتوعه حايقوا على مرحلتين والباقيين كل واحد يقدر يرشح نفسه.. فهى العملية بهذا هيبقى الدائرة فيها ١٠ أو ١٥ واحد.

سرى للغاية

أبو النور: وبعدين هل إحنا هنضمن بتوع الاتحاد الاشتراكى؟

عبد الناصر: لأ.. هم بتوع الاتحاد الاشتراكى هيشغلوا ضد بعض!

السادات: هيفتوا للتانيين.

شقىر: يعنى فى الغالب هيسقطوا بتوع الاشتراكى، والتانيين واخدين أصواتهم زائد أصوات بتوع الاتحاد الاشتراكى.

الشافعى: لأ.. هو إذا حصل تركيز فى الاتحاد الاشتراكى على الناس الللى هم حايبقوا ممثلين للاتحاد الاشتراكى قصاد أى حد تانى طبعاً..

أبو النور: حنت.. حنت!

شقىر: لأ.. ومركزى.

السادات: لأ.. حنت حنت هينجح فى حنت حنت، حنت هينجح وحنت لأ.

فريد: القاهرة على أساس إنها ممسوكة.

السادات: هنا ممسوكة لكن بره لأ.. مش مضمونة.

داوود: مانقدرش نقول كده فى الأرياف أبدا.

السادات: لا.. لا.. لأ.. اطلاقاً.

الشافعى: الأرياف أصله بيستوى يعنى لكن هنا..

سرى للغاية

استينو: الاقتراح اللى بيقوله الدكتور لبيب اقتراح كويس، يعنى اللى هو ٤ أو ٦ ويمنع دخول أى حد تانى.

السادات: هى دى النقطة بس ياريس إنه يمنع دخول أى حد تانى، يعنى الاتحاد مايتساش ينزل ٤ أو ٦ وبعدين يجيبوا ناس تانيين نازلين كمان؛ يعنى ٤ أو ٦ ويمنع دخول أى حد تانى.

عبد الناصر: إيه رأيك يا ضياء؟

داوود: يعنى هو والله الواحد محتار، هو الفكرة إذا كنا إحنا عاوزين نشعره إن الاتحاد الاشتراكى له دور ممكن إنه هو بيقول من إنه بيزكى من عدد معين من أعضاء المؤتمر ويحصل عليها ما يحصل، إنما المهم إنها تبقى تركية. وممكن نشغل تنظيميا إنه مايدوش لفلان أو يدوا لعلان، إنما برضه هتبقى فيه ناس ماخدوش وهيروح يرشح نفسه يعنى ممكن برضه ماياخدش هذه التركية ويروح يرشح نفسه، هتبقى برضه مشكلة لأنه احتمال إنه ينجح أو احتمال حتى اللى زكى إنه هو بيتخذ موقف تحدى هتبقى مشكلة الحقيقة!

الشافعى: هو زى ما الرئيس قال: إن يعنى فى الطرف الآخر هو البلد ككل يمكن فى هذا الموضوع يعنى بيبقى موضوع رئيسى، يعنى إيه الحاجة اللى بتبقى مقبولة من الناس كلها؟

عبد الناصر: لأ.. يعنى بدى أقول لك: إن الناس اللى بيتكلموا لن يقبلوا أى حاجة، بدليل إن مجلس الأمة اللى فات فتح الباب فيه لكل الناس وكذا، وحصل هجوم عليه وقالوا: إن أنور السادات قاتل الديمقراطية فى البلد! الحقيقة هو أنا يمكن الأول كنت بأفكر إن الموضوع يترك كلية، وفى هذا يمكن الواحد كانت تحكمه عدة اعتبارات؛ برضه الديمقراطية والكلام اللى.. وأنا يعنى بقول الآتى: أولاً: لازم الاتحاد يكون له دخل فى هذه العملية، وبعدين هو أنا كنت ميال أخط ضعف العدد والناس تنتخب؛ يعنى برضه الاتحاد الاشتراكى يرشح ضعف العدد والناس تنتخب، لكن إفرض المؤتمر اتفقوا كلهم مع بعض إنهم يحطوا العدد بس مش ضعفه، ليه أقول لهم حطوا ضعف العدد؟!!

سرى للغاية

شقيير: ضعف العدد أو ثلاثة أمثال العدد.

السادات: يعنى هو حر إذا وافق على اتنين خلاص.

داوود: بس بشرط مفيش غيره.

عبد الناصر: لا.. لأ.. مفيش غيره، بس بقى يبقى لازم نحط فى الدستور إن اللجنة المركزية تستطيع إسقاط العضوية عن أى واحد أو حاجة بهذا الشكل.

السادات: دى ممكن تيجى فى الهيئة البرلمانية ياريس، يعنى يتعمل تنظيم للهيئة البرلمانية ويبقى هذا التنظيم إذا اللجنة المركزية سحبت ثقتها من عضو وأسقطت عنه العضوية أو سقطت عن العضو العضوية العاملة بأى شكلها من الأشكال، لازم يخرج من المجلس.

شقيير: ده موضوع دستورى.

السادات: آه.. بقول يعنى نبتديه بالهيئة البرلمانية علشان الالتزام الحزبى، وبعدين يبقى automatic بيتنفذ دستوريا.

عبد الناصر: هم فى كينيا قال لك إيه؟ ابنتت النواب يتنقلوا من حزب كنياتا لحزب أوجنده، فعمل قانون اللى يتنقل من حزب لحزب تسقط عضويته.

السادات: يفقد دايرته.

عبد الناصر: يفقد دايرته ويعاد الانتخاب، مشبوا فى هذه العملية ويقوا يسقطوا بتوع أوجنده، جه بتاع زامبيا عجبته الفكرة عملها، طلعا الناس بيتنقلوا من الحزب الثانى له! (ضحك)

أصوات: (ضحك)

سرى للغاية

عبد الناصر: هو الحقيقة أنا مش عاوز أموت المجلس، يعنى رأى إن يكون المجلس حىّ وفيه مناقشات وكذا، ولكن مايقاش فيه عمل مضاد يعنى مايقاش فيه سفالة وعمل مضاد! ضياء إحنا عرفناه من المجلس والراجل اتكلم وأنا سمعته كذا مرة ماكنتش شفته حتى لغاية ماجه عندى فى البيت لكن عارفه. لكن بقى تبص تلاقى فيه مجموعة من الناس اللي بيقفوا يتكلموا - حسن حافظ ومش عارف إيه - بعدين كلامهم سم، وبعدين اتخدوا من الحصانة البرلمانية سبيل ويوم ما جم الطلبة راحوا يهيجوهم! وبعدين بيقف أحمد سعيد يقول: إن أنا سمعت إن الكورة هاترجع لا.. فى البرلمان فى مجلس الأمة الكلام ده! يعنى معناها إن احنا هانرجع الكورة لنلهى بها البلد عن قضاياها! دى ناس مجانيين.

الحقيقة أنا رأى إن المجلس بالطبيعة اللي حصلت بيتحزب لنفسه بس مش هيفصل حد، بعدين أنا يوم ما كان فيه فكرة لفصل مجدى حسنين أيام البغدادى أنا وقفت ضد العملية دى ضد عملية الفصل للمبدأ؛ يعنى مفيش داعى نأخذ مبدأ الفصل.

لكن الحقيقة النهارده كيف يسيطر الاتحاد الاشتراكى على مجلس الأمة؟ ده الموضوع، يبقى إذا لازم بيكون مجلس الأمة ملتزم حزبيا ولن يلتزم حزبيا إلا إذا حس إنك تقدر تشيله، طالما هو محصن كام سنة؟ ٤ سنين أو ٥ سنين خلاص.

السادات: هو اللي بيحصل فيه نوع من السلبية ياريس برضه كان تاعبنى جدا، يعنى مثلا فى اللجنة المركزية الناس بتحدد موقفها لكن فى مجلس الأمة محدش حدد موقفة أبدا.

عبد الناصر: اللجنة المركزية محده موقفها لأن الجلسات مابتتنشرش! (ضحك)

أصوات: (ضحك)

السادات: ما هو درويش غير.

داوود: ما هو بعض الناس غيروا كلامهم اللي قالوه فى المؤتمر عن اللجنة.

شقىر: سيادتك قلت بعد اللجنة المركزية إن أحمد درويش كلامه معقول وكان كويس.

سرى للغاية

عبد الناصر: لأ.. أنا لما عرفت إنه عيان قلت: إنه أنا عارف الحكاية اللي حصلت، لكن أبو زيد اتكلم.

السادات: أبو زيد اتكلم زى ماهو.

عبد الناصر: الحقيقة هل نفكر فيها لبعد بكرة؟

السادات: آه.. قوى.. قوى.

أبو النور: بقول يعنى إذا كان ممكن مانسمحش لاثنين، علشان برضه مايتقالش إن احنا ضغطنا علشان الاتنين اللي احنا عايزينهم، ولما يبقوا ٤ على أساس إن احنا نسيب الناخبين يختاروا من الأربعة اللي عايزينهم هم فى هذه الحدود، أى واحد من الأربعة ينجح بتاعنا.

داوود: هو فيه بيحصل حاجات زى المرة اللي فاتت، حصل إن فيه واحد بيقول: أنا عايز أعرف رأى الاتحاد فى إيه؟ فبيقدم وهو معدوش نيه الترشح بيتقدم على أساس بس إنه يعرف رأيه إيه حاياوافقوا عليه ولا لأ.

أبو النور: إفرض مثلا اتقدم عشرة لأى مركز من المراكز، ويتوع المؤتمر فى المركز وبيتكلم مع العشرة دول وبيقدر موقفهم إيه، وبعدين فى الآخر بيصفى على ٤ فى المتوسط ويقول دول متروكين للجماهير يتقدموا واللى تاخده منهم ماشى. طبعا إحنا بعدنا كل عنصر مضاد والأربعة دول هم أحسن أربعة ماشيين معانا، أى واحد ينجح منهم واحد بس يبقى قدام الناس إن الناس فاضلت بين واحد وواحد، ماخطناش قدامهم اثنين مفيش غيرهم هم اللي بيجوا.

عبد الناصر: آه.. لكن مثلا إمسك دايرة أنور السادات إتأخذت بالتركيزية.

السادات: آه الدور اللي فات.

سرى للغاية

عبد الناصر: طب هتجى تحط أربعة ليه؟ فيه دواير إتأخذت بالتزكية كلها كده وكده وياكو نزل فيها اتنين ونجحوا على طول بالتزكية ودخلوا، ومعنى إنه ينجح بالتزكية إن بيدخل أيضا الانتخابات والناس بتقول عليه: آه. فبنمسك الحقيقة كل الدول الشرقية من الصين لكوريا.. الى آخره بينزلوا العملية دى الناس بتجتمع..

داوود: الحزب بيتدخل.

عبد الناصر: مش الحزب كل الهيئات بتجتمع وتقرر مين اللى هيترشح، يترشح فلان بيزكوه وبينزل فى الانتخابات ويبستفتوا عليه آه ولا لآ؟ وأنا بقول برضه هو الواحد مش راسى الحقيقة لسه، مفيش داعى أقول أربعة أقول أربعة على الأكثر؛ يعنى المؤتمر حسب بالنسبة للصعيد مثلا ناس مايجبوش يدخلوا معركة.. حانتزله إنت معركة ليه غصب عنه؟! وهم فى الريف أو غالبية الريف يعنى بيبقى الناس بيتفاهموا مع بعض.

شقيير: هو على الأكثر بنسيبها لكل مؤتمر جاب اتنين جاب أربعة.

عبد الناصر: معنى هذا إنك هتعمل معركة انتخابية فى كل الدواير.

أبو النور: هى بس علشان العملية أول مرة بندخل فيها بهذا الطريق، مش عايزين نحدد يعنى يتقال هم جابوا ونفس الحكاية وقفلوا الدواير باعتبارها أول مرة بندخل فيها بهذا الطريق.

عبد الناصر: هو إحنا إذا إدينا العملية للمؤتمر غير إن احنا - كلجنة تنفيذية عليا - بنشطب ونعترض، ووسعنا حتى المؤتمر بضم الأمناء والأمناء المساعدين ولجنة المحافظة من المؤتمر متهيألى.

فريد: أيوه وأمناء وأمناء المساعدين للوحدات.

السادات: الوحدات الأساسية.

سرى للغاية

عبد الناصر: آه.. ودول بيزكوا ٢ أو يزكوا ٤ لكل دايرة هم أحرار، الحقيقة متهيألى الناس هيقعدوا وهيتفاهموا وهيتفقوا لكن مأنصش على أربعة. أنا كان الأول برضه فكرتى أنص على أربعة أما افتكرت لقيت فيه دواير ناس مدخلتهاش محصلش فيها انتخابات؛ يعنى دايرة فايق الأخرانية ماوصلش فيها انتخابات، برضه ن فكر فيها الحقيقة لغاية بعد بكره.

داوود: بس هي الحكاية عاوزة بيت فيها بسرعة علشان فتح باب الترشيح بعد العيد مباشرة.

عبد الناصر: ماهو أنا بقول بعد بكره.. بننتهى بعد بكره علشان اللجنة المركزية.

داوود: ويعدين هي العملية لسه حتأخذ وضع تانى، يعنى الشهادات اللي هتصرف للمرشح حايتحدد فيها صفته لسه مشكلة الصفة، هي اتحدت الصفة فى الفترة اللي فاتت بالنسبة لكل اللي رشحو نفسهم.

السادات: لأ.. هو جاى دلوقتى كلام اللي جاى من القواعد من الناس بيقولوا: الصفة اللي دخل بيها الانتخابات اللي فاتت العضو من دول على طول، علشان دلوقتى حصل تغيير كبير قوى بعد انتخابات الاتحاد الاشتراكي علشان يعدلوا نفسهم على الصفة الجديدة على أقل ١٠ فدادين يعنى؛ فالقواعد بتطلب بتقول: الصفة اللي دخل بيها الانتخابات الاتحاد الاشتراكي السنة دى تفضل زى ماهى.

داوود: واللى مدخلوش بقى اللي مدخلوش انتخابات الاتحاد الاشتراكي وهيرشح نفسه لمجلس الأمة.

عبد الناصر: محمد السيد دخل فلاح إزاي بقى محمد السيد فلاح؟! أنا رأيت إن التعريف فيه ثغرة بالنسبة للفلاح!

داوود: هو لما جينا إحنا استثنينا الشهادات العليا استثنيناها بالنسبة للعمال، ونسبناها بالنسبة للفلاحين.

سرى للغاية

شقىر: ناقشناها فعلا يا فندم.

السادات: وبعدين فيه نقطة ثانية، المحافظات اللى على خط النار علشان مايجراش فيها انتخابات..
يعنى فى السويس وفى الإسماعيلية فعلا لا يمكن إجراء الانتخابات لأنه فيه مهجرين،
بورسعيد الأمين بيطلب عدم إجراء الانتخابات، بالرغم إن بورسعيد ماتهجرش منها حد
لكن بيطلب عدم إجراء الانتخابات.

عبد الناصر: مانجيب النواب القدامى بتوع بورسعيد والسويس والإسماعيلية.

السادات: لا.. تطلع يعنى مبدأ قانونى يعنى زى برلين الغربية ياريس مايبحصلش فيها انتخابات
خالص..

داوود: ممكن تنظيميا عن طريق المؤتمرات بتاعتهم إن هم يقفلوها على اتنين بس.

السادات: الأمين بتاع بورسعيد بالذات بيقول: أنا محصلش عندى تهجير لكن أرجو ألا تحصل
عندى انتخابات لأنى أنا تعبان من مشاكل الناس، فهتبقى فرصة لإثارة مشاكل!

عبد الناصر: حسن رشدى؟

السادات: حسن رشدى آه.. حاجة تالته: بعض ضوابط عايزين نخطها للمؤتمرات لما تيجى تشتغل،
لأن مثلا الجماعة اشتكوا من بتوع الإصلاح الزراعى؛ مثلا بيبقى مسئول الإصلاح
الزراعى بحيث عايز ينزل فى الحتة دى، لا هو منها ولا سبق نزل فيها ولا ولا لكن
بحكم مصالح الناس عايز يستعمل سلطته ينزل فى الحتة دى! أو رئيس مدينة أخوه نازل
وهو قاعد فى الحتة نفسها اللى هو فيها يعنى؛ شوية ضوابط عايزة ننبه الناس لها.
وبعدين فيه حاجة أخيرة بقى فى الانتخابات الأمريكية الأخرانية، أنا بعت أجببها علشان
أشوف إيه بالضبط علشان أقدم ورق عنها.. لجنة أخلاقيات المعركة.

داوود: ده حتى الحد من الاخلاقيات اللى هناك ماينفعناش أبدا.

سرى للغاية

السادات: لأ.. ده أنا باتكلم عن المبدأ علشان إحنا نفسنا، لأن احنا برضه محتاجين لحاجة تضبط العملية إذا جينا من اللجنة المركزية كاقترح يعنى. وأنا بعت أجيبيها على العموم علشان أشوف إيه اللي بيجرى فيها علشان أقوله.

أبو النور: إذا كنا هناخدنا معدش ليها داعى ده اثنين أو أربعة.

السادات: لا.. لأ.. أنا باتكلم على أخلاقيات المعركة برضه أصل عبد الشافى عاملنا حاجة وسخة قوى!

أبو النور: عبد الشافى حد هيدخله.. حد ياخده تانى؟!

السادات: آه.. بس إيش عرفنى يمكن يجيلى واحد من اللي جايبين.. يمكن عبد الشافى!

داوود: وبالنسبة لمستويات الاتحاد الاشتراكى كلها بما فيها اللجنة التنفيذية العليا مباح الدخول يعنى؟

عبد الناصر: إيه رأيكم؟

داوود: متهيألى مفيش مانع، مش إجبارى يعنى طبعاً.

السادات: من يرغب يعنى.

داوود: مفيش تعارض.

عبد الناصر: هو أول ما اتقال إن اللجنة التنفيذية العليا هتدخل واتقال فى الجرايد هذا الكلام، ابتدت حملة كبيرة على أنور السادات، قالوا: ده الغرض من هذا الموضوع إدخال أنور السادات وابتدت حملة شديدة فى الموضوع!

سرى للغاياة

اللى أنا متصوره الحقیقة لازم اللجنة التنفيذية العليا تخش، یعنی حتى برضه بيبقى الشغل جوه المجلس بيبقى مننا ومن الناس التانيين؛ یعنی اللى عايز يخش، طب مين فيكو عايز يخش؟ برضه دى بتضبط لنا.

اسيتتو: اللى عايز يخش بيبقى ضامن ١٠٠٪ النجاح یعنی؛ لأن صعب قوى عضو اللجنة التنفيذية يسقط فى الانتخابات! (ضحك)

أصوات: (ضحك)

عبد الناصر: زى بغدادى بتاع جامعة إسكندرية.

الشافعى: متهياىلى دى تكليف یعنی إذا كلف واحد.

شقىر: يافندم إذا مكانش فيه داعى محدد لدخول البعض، يمكن لو أذنت لى سيادتك إلا لو داعى محدد لشخص سيادتك بتختاره بينزل بتكليف.

عبد الناصر: على أساس إنه يمك رئيس المجلس.

شقىر: أيوه جايز أو للتأثير فى المجلس.

أبو النور: یعنی اللى سيادتك تراه يدخل.

عبد الناصر: أنا من رأبى أنور ماينزلش! (ضحك)

أصوات: (ضحك)

السادات: أنا شفت إمبراح كاردل والله ياريس منظر فى غاية الجمال..

سرى للغاية

عبد الناصر: عضو.

السادات: قاعد عضو.

عبد الناصر: شفته فين إمبارح؟

السادات: في التليفزيون، عضو واقف ودخل المنبر واتكلم ورئيس المجلس اللي كان هنا ياريس..

عبد الناصر: الطويل.. الأصفر ده؟ هو أنا دلوقتى الحقيقة بافكر هم هناك الحقيقة مدخليهم كلهم فى المجلس، بس بقى هو الدستور بتاعهم إن العمليات كلها من المجلس يعنى مثلا تيتو عضو فى المجلس؛ لأن المجلس ينتخب من بين أعضائه رئيس الجمهورية، وبعدين المجلس ينتخب من بين أعضائه رئيس للحكومة، وبعدين المجلس ينتخب من بين أعضائه الوزراء.. ده الدستور اليوغوسلافى. فكل العملية إنها من خلال المجلس، ثم المجلس يعزل أيضا مش تيتو! يعنى هناك المجلس وهو اللي يعزل وهو اللي يولى والعملية كلها؛ على أساس إن المجلس الشعبى اللي هو مجلس الأمة وهو ده بيمثل البلد ويتطلع منه السلطة التنفيذية. وبعدين المجلس هو اللي بيعين السلطة التنفيذية وهو اللي بيثيل السلطة التنفيذية، لكن الحقيقة العملية مش كده العملية الحقيقة الحزب هو اللي بيمشى العملية كلها؛ فنتيتو مثلا مايشلش ولا بيعين ولا حاجة زى إحنا هنا مثلا أنا باعين الوزراء وأعفيهم وأقبل استقالاتهم، هناك لأ.. المجلس إذا عاز حاجة بيعرض على المجلس. الصين نفس العملية رئيس مجلس الدولة بينتخبه المجلس والوزراء بينتخبهم المجلس والعملية فى المجلس.

داوود: إحنا واخدين جزء هنا برضه إن المجلس بيشارك فى انتخاب رئيس الجمهورية الجزء الأول اللي قبل الاستفتاء.

عبد الناصر: آه.. لكن الحقيقة هناك عملية المجلس عبارة عن عملية ماشية بالإجماع.

أبو النور: لكن الحزب مسيطر عليها.

سرى للغاية

عبد الناصر: وبعدين مفيش مساومات وكلام من ده، والحقيقة هم فى سبيل إنهم يطلعوا عناصر جديدة لأن عملية التغيير ده slogal طلع فى يوغوسلافيا من فترة من يمكن سنة ١٩٥٨. يعنى هو تيتو كان ليه ٤ نواب رئيس الجمهورية، وبعد كاردل راح مسك ده وبعدين التانى مسك الاقتصاد ومسك الحزب.. اللي هو تيدوروفيتش مسك الحزب. فضل راكوفيتش، وبعدين حصلت العملية اللي بينه وبين راكوفيتش، وبعدين عين بوبوفيتش وبعدين بوبوفيتش ساب. وبعدين المجلس الحقيقة هم مقسمينه الى ستة لجان الخدمات، وبعدين كل الناس الحقيقة بينتخبوا. طريقتهم غريبة غير الطرق التانية، معندهمش بقى العملية اللي عندنا اللي أسئلة وأجوبة واجتماعات! فاحنا الحقيقة بدنا نوفق بين الطريقة الشرقية والطريقة الغربية، لكن هم كلهم أعضاء فى المجلس الاتحادى، يعنى عملية بنفكر فيها على مهلنا.

طب دلوقتى حانروح بعد بكره اللجنة المركزية هيحصل إيه؟ يعنى هو ده الموضوع المعروض للبحث.

السادات: يعنى إذا حبيت إن أنا بكره آخذ هذا الرأى نتبنى اللجنة ونوصى بهذا الرأى اللي احنا قلنا عليه ده؛ أربعة بحد أقصى يعنى نعمل تقرير ونتبنى إحنا اللجنة.

شقىر: نزقه من بره.

السادات: لأ.. المقرر بيقول إن احنا بعد ما عرضنا الحلول دى كلها، اللجنة بتوصى بكذا وكذا وكذا ممكن يعنى.

عبد الناصر: أمال هنتح موضوع المناقشة فى إيه؟

داوود: لأ.. أنا رأى يتعرض الآراء كلها زى ما هى كده.

شقىر: ونمهد الجو للرأى ده.

عبد الناصر: هل إنتو شايفين إن عملية بحد أقصى ٤ عملية سليمة يعنى مع مؤتمرات المحافظات والسكرتيرين ومؤتمرات المراكز والأقسام؟

سرى للغاية

استينو: وأى واحد يرشح نفسه مادام عضو اتحاد اشتراكى.

عبد الناصر: أى واحد يرشح نفسه لكن هم اللى بيقررؤا، هى كأنها طبعا عملية على مرحلتين.

شقيير: آه.. بس هى يعنى تزكية بالترشيح، زى الوفد هنا يافندم مكانش حد يجروُ يخش دايرة إذا رشح الوفد لها واحد، وإذا تقدم واحد تانى يفصل على طول.

داوود: فيه نقطة إن بعض الدواير مركزية واخدة جزء من المركز ده وجزء من المركز ده.

أبو النور: بتحصل، مثلا إحنا عندنا فى بنى سويف مركز الفشن واخذ نص مركز سمسطا؛ بتقدر تأخذ المؤتمر بتاع مركز الفشن اللى موجود وياخذ مندوبين المؤتمر بتوع البلاد اللى منضمة لهذا المركز.

داوود: طبعا بيبقى واضح ماشى.

عبد الناصر: طيب بتجهزؤا، وبعدين إحنا قبل مانقول رأى بفتح باب المناقشة للآراء، قد نصل الى رأى يوم الأربعاء وإن موصلناش بنعمل جلسة يوم الخميس.

داوود: كفاية الأربعاء علشان سيادتك.

عبد الناصر: لأ.

داوود: وبعدين حتى يبقى الخميس فرصة للإجراءات اللى هنتخذها أو القرارات اللى هتصدر.

عبد الناصر: قرارات إيه؟

داوود: ماهو طبعا ترجمته لازم هيبقى فيه قرارات، لازم هنتطبع شهادات معينة وبعدين اللجان عاوزة تجتمع تحدد مواعيد، وبعدين فيه قرار وزارى ضرورى وزير الداخلية بيحدد.

سرى للغاية

عبد الناصر: يبقى مفيش داعى لاجتماع يوم الثلاثاء بقى، كنت بقول: إن احنا نفكر لغاية يوم الثلاثاء نيجى يوم التلات الظهر قصدى يوم الأربعاء الظهر بعد بكره؛ أنا كنت بقول على أساس إن احنا مش راسيين وأنا شايف إن احنا راسيين.

السادات: لأ.. إحنا راسيين دلوقتى ياريس.

عبد الناصر: الساعة بقت ١٢! (ضحك)

أصوات: (ضحك)

عبد الناصر: السلام عليكم.